

DÎYÌ DYÀ CIMANYINU



Shaalaayiku biimanyine kuulu anu bwa tusunsa tukese cyanaana mu Bwikadi bwa Mukalenge. Tubalaayi mu Dîyì Dyende, mu Ekesoode, nshapita mwi4.

. . . Mòsà kwandamuna e kwambaye ne: Kadi, tangila, bôbò kabaakungitabuuja to, anyi kabaakuteeleja dîyì dyanyi to: bwalu bôbò nebâmbè ne: MUKALENGE kî mmukumwenekele to.

Ki MUKALENGE kumwambilaye ne: Cidi mu cyanza cyebe aci ncinyi? . . . yêyè kwamba ne: Dikombo.

Ki yêyè ne: Dyèlè panshi. Ki yêyè kudyela panshi, ne dyôdì kwandamuka nyoka; kî Mòsà kubangaye kunyeema kumpala kwende.

Ki MUKALENGE kwambilaye Mòsà ne: Olola cyanza cyebe, ne umukwacile ku mukila. Ki yêyè kwolola cyanza cyende, ne kumukwataye, kî yêyè kwandamuka dikombo mu cyanza cyende:

Bwa kwitabuujabo ne MUKALENGE Nzambi wa baataatù baabo, Nzambi wa Abraham, Nzambi wa Izaka, ne Nzambi wa Yakobo, ngudi mukumwenekele.

Ki MUKALENGE kumwambilaye kabidi ne: Teekaaku mpindyewu cyanza cyebe mu cyâdì. Ki kuteekaye cyanza cyende mu cyâdì: kadi mmwenze anu ucyumusha, monaayi, kwikalaci ne nsudi anu bu nêjè.

Ki kwambaye ne: Teekaaku cyakabidi cyanza cyebe mu cyâdì. Ki kuteekaye cyakabidi cyanza cyende mu cyâdì; ne kucyumushaye mu cyâdì, nenku, monaayi, kwandamukaci cyakabidi bu muwua mubidi wende mukwabo awu.

Nenku nebyenzeke ne, bôbò kabayi bakwitabuuje wêwè, anyi kabayi bateeleje ku dîyì dya cimanyinu cya kumpala to, nebiitabuuje dîyì dya cimanyinu cya ndekeelu.

Ne nebyenzeke ne, bôbò kabayi bakwitabuuje wêwè, bimanyinu bibidi ebi, anyi kabayi bateeleje dîyì dyebe to, newangate mâyi a mu musulu, ne neùàmwangè pa buloba bûme: ne mâyi awikala mwangate mu musulu awu neandamuke mashi pa . . . buloba bûme.

² Twinyikaayi mitu yetu bwa disambila. Mpindyewu pawikala ne dilomba, mu diloolo edi, dyûdì ujinga kumanyisha kudi Mukalenge, ela anu byanza byebe muulu wâmbè ne: “Mukalenge, wamvulukaku mpindyewu. Ndi ne dijinga.”

³ Taatù wetu wa mu Dyulu, nyewu tuseemena cyakabidi Kûdi diloolo edi, bamanye ne patudi twinyika mitu yetu panshi bayitangije ku buloba kutudi bafumine, ne, Wêwê munenge, netwalukile ku lupwishi. Kadi biikàle ne ditekemena dibenesha dya mulayi udi mu Kilisto, wa ne bônso badi mu Nzambi Kilisto nealwe naabo pamwe Nende. Tudi—tudi tuKusakidila bwa mulayi wa butumbi ewu. Nenku nyewu ndomba, Nzambi, bwa Wêwê kuvuluka muntu ne muntu wa ku badi beele byanza byabo muulu aba, ne cyanyi paaci, Mukalenge.

⁴ Ndi ndomba, diloolo edi, bwa ne mu nkomenu wa dîbà dya diitabuuja edi, upeesheku bantu diitabuuja diloolo edi, bwa Mukalenge Yesu ikalè mulelela menemene kudi muntu ne muntu wa kutudi, mu mushindu wa ne kakwikadi muntu ne butekete munkaci mwetu paanyima paa diloolo edi to. Swaku bwa ngènzàmpèkààtù yônso amanye ne ùdi mu Bwikadi bwa Mukalenge Yesu, ne pa dîbà adi anyingalale ku mpekaatu yende, ne afile mwoyi wende Kûdi, ne ujiibwe ne Nyuma, mu mēbà mabi a ndekeelu aa, patudi tucimona cifwanangane ne mundidimbi munenaenaale wenda ùlamba pa buloba apa.

⁵ Tudi tulomba, Nzambi, bulombodi bwa Nzambi, diloolo edi, mu dyakula ne mu diteeleja. Swaku bwa Nyuma Mwîmpè angate disangisha mpindyewu ne acibwile muntu ne muntu wa kutudi Dyâmpà dya Mwoyi bilondeshile dijinga ditudi naadi, bwalu tudi tulomba nunku mu Dînà Dyende. Amen.

Nudi mwa kusòmbaayi.

⁶ Ndi ne dyeyemena dya ne diloolo edi netwikale mwa kukumbaja citudi tuteeta bwa kwenza ne bantu bàmonè, bu—bulelela bwa kwikala ne diitabuuja kudi Nzambi.

⁷ Mpindyewu, maalaba mu mapingaja pa dîbà ibidi ne tusunsa makumi asatu, bônso bìikalà ne twarta twa disambila netubasambidile. Nenku pashiishe bwa kwikala batwishiibwe ne kî nkushaale bantu, kabayi ne twarta twa disambila to, diloolo dyônso tudi twabanya twarta twa disambila. Nenku yêyè neàtwàbànyè cyakabidi maalaba, pa kwipacila. . . ngeela meeji, pa kwipacila dîbà umwe ne tusunsa makumi asatu anyi cintu bu nanku awu, ànu pabwîpì ne disangisha kubangadi. Nenku aba bônso badi ne dijinga dya kumasambidilabo, yônso wa ku bananga beenu abu, alwe apete karta kaa disambila. Ncya bushùwà ne neikale—neikale mwakidila bilenga bwa kupeta karta kaa disambila. Nenku netwikale mwa. . .

⁸ Ndi muswe kusambidila bantu, mu dibatentekela dya byanza ne dibasambidila. Mpindyewu pîikalà diitabuuja dyebe kadiyi mwa kubànda mu Bwikadi bwa Mukalenge Yesu ne kuMwakidila bu Mwondopi webe, kadi witabuuja anu ne twêtù bakusambidile ne bakutentekela byanza, aci necikukwacishe, ee, ncyà bushùwà ne tudi mwaba ewu bwa kwenza cyônso cinudi nujinga aci.

9 Kabingila kândi ntentemwina bwalu ebu too ne paanyimà, ntanta mule, mbwa kwenza bwa ne muntu yònsò ùndi mufwanyine, ùdi mwa kufika ku dyolola cyanza ne kukwata Nzambi pa bishimikidi abi. Nenku mbwà katwikadi naabo bapitepite búngi to. Kudi . . . Citanda kí ncinene to, ne pa nanku katwakwikala ne bantu bapitepite búngi to. Nenku tudi mwa kwangata mappingaja a maalaba ne kusambidila bònsò batudi naabo mwaba ewu aba, tuteeka mappingaja awu bwa kiipacila aku, bwa kusambidila babeedi.

10 Nenku tudi mwaba ewu mbwa kwenza cintu kana cyònsò citudi mwa kwenza bwa kutamba kunulengejilaku nsòmbelu ndambu, kunupepejilaku bujitu, mu lwendu lutudi twenda tuya emu.

11 Ne pashiishe pa dîbà kana dyònsò, didi muntu kanà yònsò udyumvwa ne—ne udi ujinga kulwa kudi Mukalenge Yesu adi, nansha biikàle ne ncutupa kaayi cya disangisha cidi munkaci mwa kwenzeka aci, wêwê lwâku anu pa diine dîbà adi. Kwindidi too ne piikalà dibiikila dya ku cyoshelu ne cya kwenjiibwa to. Kwindidi too ne piikalà dibiikila ne cya kufidiibwa to. Wêwê lwâku anu pa dîbà adi, witabe Kilisto, useemene buludi kuneeku uMujikule anu pa dîbà adi mene. Bwalu aci ki kiipacila keetu kanene kaa diikala dyetu kaaba aka, nkaa kumona misuuka yilediibwa mu Bukalenge bwa Nzambi.

12 Nenku mpindyewu, maalaba ndyalumingu, nenku nekwikale kalaasa kaa Dyalumingu, mu maekeleeziya. Cidi cyenza ne twikale ne etu masangisha mu mappingaja, mu dyalumingu, mbwa katwikadi mwa kupangisha nansha kakese disangisha kampanda. Tudi twitabuuja ne mwena Kilisto yònsò ewu udi ne cya kwikala ne—ne ekeleeziya udi ne ki kwabo kumbelu kutuye uya. Bidi bikengela bwa mwena Kilisto yònsò ikale ukadisangishilaku mwaba kampanda pamwe ne beena kwitabuuja. Nenku mwaba wònsò wùdì ukadisangishila awu, ki ekeleeziya nyêyè awu.

13 Mpindyewu, bu ne mvwa musòmbèle muneemu emu, mvwa mwa kwikala wa mu umwe wa ku ekeleeziya ya muneemu, yidi bampaasata badi mwaba ewu aba ayi, bàdi bàkwàcishanganà neetu mu mudimu, baleeja mpala wayi aba. Bwa cinyi? Bwalu badi mwaba ewu basòmbè pa cibumba cya ku cyambilu, bwa babamone kudi bantu bònsò ne, mbiitabe bidi munkaci mwa kwenzeka ebi. Mbiitabuujè mudimu wa bwambi wa mushindu ewu, dyondopa dya kudi Nzambi, dibatiiza dya Nyuma Mwîmpè, ne bikwabo. Badi mwaba ewu biikale bawufidila bujaadiki. Bòbò mbavwa bambiikidishè bwa mêmè kulwa mwaba ewu, bwa ne pàmwāpa mudimu wa bwambi udi Mukalenge mumpe wamona mwa kukwacisha masangisha abo.

14 Mpindyewu mpaasata mulelela nyêyè awu, udi wenda ukebangana ne bipeta byònsò bya Nyuma bidiye mwa kupeta abi, bya cyònsò cidi Nzambi munkaci mwa kwenza abi, mwikale

uditacisha ne mwende mwônsò bwa kukwacishaku ekeleeziya wende bwa kuyaye kumpala bwa Nzambi. Ncya bushùwà ne ntu ntuula cifulu cyanyi bwa kuneemeka mpaasata bu nanku awu.

¹⁵ Ne bantu aba bivwa bikengela bwa kwenzabo paabo ciine aci mu lutatu lukole, bôbò aba. Nudi mwa kwitabuuja ne aci ncilelela. Bivwa bikengela kwenzabo ciine aci mu lutatu lukole. Nenku ndi—ndi ne kusakidila bulelela bwa balume banene ba Nzambi baa mushindu ewu, badi bajinga kwangata kaaba kaabo ne kaaba kaabo kaa mudimu pa bidibo batwishiibwe ne mmudibi, kadi—kadi kwitabuuja. Nzambi atambe kubabenesha!

¹⁶ Ne ndi mutwishiibwe ne bôbò nebànwänzèlè bilenga. Mpindyewu, pawikala mwenyi mwaba ewu, keba upete mwaba udi bânà beetu aba ne ekeleeziya yabo, udibo basanganyiibwa. Nda ukabamwenekele maalaba. Nebiikale ne masangisha a pabwawu, ne kudi bambi mwab'ewu biikalà mwa kuyiisha mu ekeleeziya mishiileshiilangane, mudibo babimanyishe. Nanku nwikalaayi kwabo aku maalaba.

¹⁷ Ne pashiishe maalaba mu mappingaja, pawikala ujinga kupatuka kulwa mu disangisha dya nkomenu, ncya bushùwà ne tudi bafwanyine anu kwikala ne disanka dya kukwakidila. Ekeleeziya yônsò, mangumba ônsò, mbwa bantu bônsò. Tudi twakidila bantu bônsò: Méthodiste, Baptiste, Presbytérien, mwena Mpenta, mwena église de Christ, mwena église de Dieu, mwena Katolike, mwena Yuda wa Orthodoxe, ewu udi kayi witaba diikalaku dya Nzambi, nansha wêwè nganyi. Twêtù tudi. . . Udi mubiikidiibwe.

“Udi wamba ne: ‘Ewu udi kayi witabuuja diikalaku dya Nzambi?’” Eyowa’s, mukalenge.

¹⁸ Muntu yêyè kayi witabuuja diikalaku dya Nzambi cibi ujinga kulwa mu disangisha ne kusômba mwikale mudipope, s’tudi tumwakidila anu bu muntu mukwabo yônsò ewu. Cya bushùwà’s. Cintu kampanda, s’ki citudi tumukebela kaaba aka, s’mbwa cintu kampanda cifwanyineku kwenjiibwa cidi mwa kumukwacisha bwa kumonaye cilèma cyende, nenku kulwaye kudi Mukalenge. Bwalu twêtù. . . Cya bushùwà’s.

¹⁹ Mbanganyi bakaadiku babale kaacikeena-kumona kakese kadi cikandakanda cya Beena Kilisto baa Kantu-ku-byanza bapatule aku, ne ndi ngeela meeji ne ndambu mukwabo wa bikandakanda. . . , wa, *Kutàngila Dyàmwàmwà Dyà Rìdô Wa Cikondo?* Mpindyewu aci’s ncilelela, mulunda wanyi. Kwitabikù bwà kucipangila to. Mêmè—mêmè’s ndi mushaale muntu mupyamupya kubangila anu piine apu. Mêmè ndi mumanye ne ncilelela, pa nanku ndi—ndi—ndi ne dyeyemena ne muntu nansha umwe wa kunudi kaakupangila Dyulu dinene didi Nzambi muteekele beena kwitabuuja adi to. Wêwè mupangile, cyùdi mukumbaje pa buloba apa ncinyi? Bwalu, kwèna

mumanye ne ncikondo kaayi cyakengelabi bwa wêwê kuumuka pa buloba ebu to. Kadi udi mumanye cintu cimwepele eci ne, udi mutwishiiabwe ne newikale ne cya kuumukapu. Nenku piikalabi ne aci ncilelela, dîbà adi katwena bafwanyine kwikala batambe kukutakana pa kuteeta bwa—bwa kupeta anu. . . Katwenaku mwà kunaya ne mudilu to. Wamonu's, vuluka anu ne, witabuuje Dîyì dya Nzambi ne mulayi wònsò udi mu Dyòdì.

²⁰ Anji elayyi meeji, ncinyi cyakakeba disaamà dyònsò, dibungama dyònsò dikole edi, lufu lwònsò, lutatu lwònsò elu, tunyinyangya twònsò, mwànà mukese wa disaamà dya tukulakaji, bintu byònsò ebi, balema, bampofo, lupiitaadi lwònsò ludi lukengela kwibakiibwa elu? Mbwalu muntu umwepele wakabenga kwitabuuja anu katupa kakese cyanaana kaa Dîyì. Ûvwa ng'Eva. Sataana uvwa anu mumupeesheci mucilaabe nsukaadi pambidi. Kavwa mumuteeleleci mu cyòcì to, ùvwa mumupeesheci mucilaabe nsukaadi pambidi, wamba ne: “Ncya bushùwà ne. . . Mukalenge utu mwîmpè mutambe.”

²¹ Nutu nuumvwa bàcyàmba bikole leelu ewu ne, Nzambi utu Nzambi mwîmpè. Utu Nzambi mwîmpè bushùwà, kadi wavuluka ne Ûtu Nzambi wa cijila, Nzambi udi kayi mwa kumona mpekaatu bu udi kayi mumumone to. Cibawu ncimana kufuta, nenku bikengela ùcītàbè bilondeshile Wende mmwenenu. Kabidi wavuluka ne, Yèyè n'Nzambi wa cijji, Nzambi wa cijji cikole. Nenku newimane kumpala kwa Nzambi mwikale ne cijji, kayi anu Nzambi wa bwîmpè ne luse to. Diloolo edi Yèyè udi Musungidi webe; Dituku adi Yèyè m'Mulumbulwishi webe.

²² Pa nanku ikàle mutwishiiabwe ne kwèna ushîya cintu nansha cimwe kaciyi cyenza to, mulunda wanyi. Ka—kacyakwikala. . . Kwèna ne ciwapeta to. Kwi—kwikadi wenza bwalu ku mpuukapuuka to. Ikala mutwishiiabwe, mutwishiiabwe anu menemene, bwalu kwèna upeta mukwabo mpunga wa kubwelela to. Webe mpunga umwepele ki yèyè ewu, paucidi pa buloba apa. Vuluka muntu mubanji ne Lazaro.

²³ Kudi lupongo lunene pankaci peebe ne Yèyè, ludi muntu nansha umwe kacya kayi mwanji kusambukaku to, anyi kaadyakusambukaku to. Wamonu anyi? Paudi—paudi ufwa, bwalu bwàdikòsu. Ndi mumanye ne kutu bantu batu bamba ne badi bakusambidila bwa wêwê kupatuka mu myaba ayi, kadi kwitabuujuu aci to. Aci ncibengangane ne Dîyì dya Nzambi. Wamonu anyi? “Kudi mucu mweyemene aku, nkwaponenawu.” Ne Yesu wakamba, Yèyè mwine, ne: “Kuvwa lupongo, ne, pavwa muntu ufwa ne uya mu iferno, (kashidi kèndè) kavwa mwa kulwaku mu Dyulu to. Kacya muntu katu mulusambuke to, ne mene kî mmufwanyine kulusambukaku to.” Abu mbwalu mbudikose, bwa ku dyanyi dimanya. Paakamba Yesu ne civwa ncyòci apu, ki cyònsò cidiku.

24 Pa nanku vuluka anu ne, webe mpunga mmpindyewu, ne diloolo edi ndifwanyine kwikala webe mpunga wa ndekeelu.

25 Udiku mufwanyine kubakula cidi munkaci mwa kwenzeka anyi? Wikalapù nansà mwa kucimona's we! Ndi ntekemena ne kwêna wela meeji pândi ngaakula mushindu awu apa, ne mêmè ndi nteeta kukwenzeja bwa wêwè kutangila kùdì muntu kampanda, anyi kwitabuuja muntu kampanda to. Kî ng'aci cîndi munkaci mwa dyenza to, mulunda wanyi. Ndi nteeta bwa kukufikisha ku diitabuuja Yêyè mwena mu Bwikadi mutudi tusanganyibwa mpindyewu awu. Yesu Kilisto, Nzambi mene wâkulumbulwisha mu Dituku adi awu, udi apa mwikale udimanyisha Yêyè mwine mu bwikadi bwebe wêwè, cintu ciine cyakalaya Ye ne Yêyè neenzè mu matuku a ndekeelu aa.

26 Ngeela meeji ne Mwaneetu Price, mu dinda emu ku didya dya mu dinda, mmufile cifwanyikijilu cilenga cya dikema cya difika mu ditumba, dîbà adi bikengela kukosa ditumba. Cîvwakù cinusankishe anyi? [Disangisha didi dyamba ne: "Amen."—Muf.] Ncinusankishe bushùwà. Cîvwa citeekiibwe bilenga, bilenga bya dikema.

27 Mpindyewu, pa nanku vulukaayi ne, misangu mikwabo mu ditumba, kadi tuvulukaayi ne bitu bikengela bwa twënzè matumba aa. Ngâkayiiisha pa cyôci aci, musangu kampanda, mucînyike ne: *Masangu*. Tutu tufika mu disangu, misangu yâbûngî, bikengela tuye *eku* ne tunyunguluke tuye njila mishiileshiilangane.

28 Mpindyewu diloolo edi, bwa tusunsa tukese tûdî tûlondà etu, ndi muswe kwangata cyena bwalu cya—cya ne: *Diyi Dya Cimanyinu*. Nenku mpindyewu cyalu cyetu cidi cikangukila, diloolo edi, mu Mukanda wa Ekesoode, ne mwaku *ekesode* udi uswa kwamba ne "kwikala munkaci mwa kupatuka; kupatudiibwa." Mpindyewu teetaayi bwa kuteeleja ne ntema ne mwenu mwônso.

29 Mvwa mwa kuswa kunuyiisha katanci, nudi bateeleji balenga be, kadi ncyênàku ne dîyî diine to. Didi anu ditâcishiiibwa ndambu, ne ndi mumanye mùdîbî bifwânyine kwikala. Bidi bikengela ngiikisheku ndambu bwa mpindyewu, bwa matuku matwe ku mwandamukulu anyi ku dikumi, kumpala kwa mêmè kubanga masangisha makwabo. Nudi numona's, kadyena anu disangisha dimwepele didi apa edi to. Didi ndisangisha, ku dituku ne ku dituku, ku lumingu ne ku lumingu, ku ngondo ne ku ngondo, ku cidimu ne ku cidimu, nwamonu's, kadi nudi anu mwa kudifwanyikijilaku peenu.

30 Kadi elaaayi meeji bwa misangu yônso eyi, ku cidimu ne ku cidimu, kacya kakutu kwanji kwikala musangu nansha umwe ukaadiYe mwambe bwalu kabuyi bulelela, bupwângàne menemene to; mu myakulu yônso, munyunguluke buloba bujima, misangu mwandamutekete. Nwamonu anyi? Muntu

nansha umwe, kaaba nansha kamwe, kèna mwa kwambaku ne kabivwa bipwangane, anu mu byôbi menemene to, musangu wônsò. PadiYe wamba ne cintu kampanda neczyenzeke, neczyenzeke anu mushindu awu menemene. Ūcyamba mbingu ne ngondo, ne bidimu, mene, kumpala kwa kwenzekaci, kadi ciikàle cyenzeka cipwangane anu mu cyôci menemene. Kaciyi mwa kupangilaku kacya musangu nansha umwe to, ne kacadyakupangilaku to, bwalu n’Nzambi. Mpindyewu, mêmè ndi mwa kupangila, bu muntu. Kanwikadiku nuntangila mêmè bu cileejilu to, bwalu ndi—ndi anu bu munudi nwênù, anu ngènzàmpèkààtù wetu ewu musungila ku ngàsà. Kadi aci n’Nzambi, citambe-mfukilu, nwamonu’s, udimanyisha Yèyè mwine. Kabyena bikengela anu bwa Yèyè kucyenza to, kadi Yèyè ngwàkalaya ne Yèyè neàcyènzè.

³¹ Yesu wakondopangana bwalu civwa mbwa cyùjè Dìyì. Wakenza bintu abi bwalu mbwa Dìyì dya Nzambi kuuladi.

³² Ki bwa cinyi Yèyè udi munkaci mwa kucyenza leelu ewu, mbwa Dìyì dyùlè, dîndi munuteelele adi, ku diloolo ne ku diloolo dyônsò.

³³ Mpindyewu numonaayi dîbà adi pakaadi Bwikadi Bwende pabwîpî, Bwôbò abu, ncyà bushùwà ne, Budi bufila disaluka. Bu mûmwà ngamba mu dinda emu ne: “Cintu nansha ciikàle cinganyi cyôci kaciyi ne disaluka to ncifwe.” Ne ntendeleelu yônsò ewu yèyè kayiku ne ndambu wa disaluka mu yèyè to, mbipiciibwe ne bamujiike, mmufwe. Bwikadi abu butu bulwa ne disaluka. Yèyè utu utufuululula. Kadi patudi bafuululudiibwe, tuvulukaayi Ciine cidi citufuululule aci. Cidi cicyènzè ncinyi? M’Bwikadi bwa Nyuma Mwîmpè, Yesu Kilisto munkaci mwetu, ùdileeja Yèyè mwine ne Ūdi ne mwoyi. Kaciyi mubidi wa musunya to; paalwa adi dîbà, paapingana mubidi wa musunya awu ufumina mu Dyulu, dîbà kadyakwikalaku kabidi to. Ki cyônsò pa bwalu abu ncyôci aci. Ne tudi bamanye ne twètù, tudi ne mwoyi mu matuku a ndekeelu, mudibi bikengela bwa bintu ebi kwenzekabi.

Mpindyewu, Nzambi ukaadiku mwenze bimwangi kumpala. Kudi . . .

³⁴ Bintu byônsò bitu byenza lwendu anu mu isatu, kudi Nzambi. Nzambi mmuvwijibwe mupwangane mu isatu. Dilwa dya kumpala dya Kilisto, bwa *kupikula* Mukaj’Ende-musela; dilwa diibîdî dya Kilisto, bwa *kwangata* Mukaj’Ende-musela; dilwa diisâtù dya Kilisto, *pamwe ne* Mukaj’Ende-musela, bwa kukookesha mu Bukalenge bwa bidimu cinunu. Bintu byônsò bidi byenda anu mu isatu.

³⁵ Mpindyewu, kukaadiku, nekwikale, bimwangi bisatu. Cimwe cya ku byôbi, Nzambi wakababweja *munda* mwa bwâtù, bwa cimwangi kampanda, bábànda kumutu kwa buloba. Musangu wàkalondà, Nzambi wakabapatula *pambelu* paa—paa

Ejipitu. Ne musangu ùdi ùlondà, Nzambi udi ubambula *muulu*. Munda, pambelu, muulu! Cimwangi cidi cìlondà ndibanda dya muulu. Ki cidi kumpala kwetu mpindyewu, cikondo cya dibanda dya muulu.

³⁶ Bya mwomumwe anu mudi mwoyi wenza cintu cimwecimwe aci. Tudi tubwela *mu* mwoyi, tupatuka *pambelu* paa mwoyi, tubanda *muulu* batangile ku mwoyi, anu cintu cimwecimwe aci menemene. Pa nanku tudi . . .

³⁷ Cyalu cyetu cidi cikangukila diloolo edi ku cimwangi, nenku Nzambi uvwa pabwìpi ne kwangata ditunga Dyende.

³⁸ Izaleela nditunga. Nzambi katu ukwata mudimu ne Izaleela bu muntu nkaaya to. Izaleela nditunga, mmwenzenze naabo mudimu misangu yònsò. Nenku mu matuku a ndekeelu, paanyima paa dyu—dyumuka dya Ekeleeziya, dībà adi Nzambi neasungile Izaleela bu ditunga. Didi mu buloba bwadi patudi twakulangana apa, badilongolole bwa cyòci aci. Nenku bòbò nebasungidiibwe, Bible mmwambe ne: “Ditunga nedilediibwe mu dituku dimwe.” Nzambi katu ukwata mudimu ne Izaleela bu muntu-nkaaya to. Ùdi ukwata naabo mudimu bu ditunga, Izaleela, misangu yònsò, bwalu nditunga Dyende.

³⁹ Kadi’s ki Yêyè ewu pabwìpi ne kupatula ditunga Dyende pambelu paa ditunga kampanda, mu cimwangi, kuumusha bantu Bende ku dinyooka.

⁴⁰ Nenku anu mâyi miine àkiinyijà baa pa buloba ne kubabutula awu, ówò awu akasungila Noa. Nwamonu anyi? Nenku anu Nyuma Mwîmpè mwine awu, udi bantu babenga leelu ewu awu, neangate Ekeleeziya ne neaMwambule muulu, ne neatwale manyooka pa aba badi kabayi baMwitabuujaja abu.

⁴¹ Yesu wakamba, paakaMubiikilabo ne, “Beezezebula,” mu ngaakwilu mukwabo ne, Yêyè uvwa “mwena lubuku,” bavwa . . . Yêyè kwamba ne: “Nénnùfwilè luse bwa aci,” (Mwânà wa muntu, mulambu kawuwwa mwanji kufila to.) “kadi paalwa Nyuma Mwîmpè bwa kwenza cintu cimwecimwe aci, diyì dimwepele dibi bwa Yêyè awu kadyakufwidiibwaku luse to nî mmu cikondo eci nî mmu cikondo cilwalwà.”

⁴² Bikengela baMubenge, nenku paanyima paa cyòci aci ki paalwa dinyooka kudikuma. Nwamonu’s, lutatu ludi ne twètù . . .

⁴³ Bidi bîmvulwija bwalu bulonda bûngààkabalà musangu kampanda, bwa mwendeshi wa kale wa màzuwà umukila ku mbû, ne nso—nsongaalume kampanda mufundi wa tusala wa ba-Anglais uvwa wenda uya mutangile kwine ku mbû aku. Nenku mufundi wa tusala ewu ukaavwa mufundefunde bintu bûngì cyanaana pa bidi bitangila mbû, kadi kacya kayiku mwanji kumumona to, pa nanku ùvwa mu njila upweka mutangileku. Ki nkolomu wa pa mâyi awu kumwambilaye, ne cishiba cyende cya

mfwanka ku mishiku cishaalemu ne katupa kaa cifwanka, yêyè ne: “Uyaaya penyi, mulumyana?”

44 Yêyè ne: “Ndi mpweka mutangile ku mbû.” Yêyè ne: “Kacya nciitu mwanji kumumonaku to. Nkaadi mufundefunde pa bidi bimumtangila, ne bikaadi bakwabo bambambe, kadi,” yêyè ne, “kaa, ndi ne disanka diyila ne panshi bwa kumanya ne nkaadi museemene pabwîpî ne mbû.” Yêyè ne: “Kaa, kuumvwaku mupuuya wa mâyî ende a mukele awu! Kumonaku mudi nsongo ya mavwala ende matooke ayi yibwayika kumutu kwende aku, ne mudi cyuluulu cya bleu cimwenekelamu, ne kuumvwaku myadi ya binyuunyi bya byôkosò padibi bibuuka kumutu kwende apu, kaa, ndi ne disanka diyila ne panshi anu pa kwela mene meeji ne nyaaya kamumona’s!”

45 Nkolomu wa pa mâyî awu kwambaye ne: “Mêmè’s ndi mulediibwepu, kukaadi bidimu makumi asambombo, nciyiku ne cîndi mmona ciine cya cilenga kudiye.” Nwamonu’s, ûkaavwa mumonemone byâbûngî mu mushindu wa bishaale ciibidilu kudiye.

46 Mpindyewu ki lutatu ndwôlù alu ludi naalu ekeleeziya wa Mpenta leelu ewu. Ûkaadi mumonemone byâbûngî bya kudi Nzambi, mu mushindu wa ne Nzambi ukaadi mushaale ciibidilu kudibo. Nwênù kanulekediku aci cinwenzekela to!

47 Muneemu emu anu abidi adi panshi aa, mu Louisville, mu Kentucky emu. Mwetu, mu Jeffersonville, mu Indiana, ndîshiyà dya musulu. Inâbânzà kampanda uvwa wendakana mu makajiinyi a bintu bya mushinga mupuutula. Nenku ùvwa . . . ùvwa ne kânà kaa balume mu diboko, nenku ùvwa uya ku meesa a cisumbishidi kadi mwikale wamba kutudika ne mwadi. Ûvwa mwa kwambula cintu kampanda, kucileeja kânà kaa balume aku; kânà aku kavwa kasômbe kacya anu kaalengama. Ûvwa mwa kuya ku makwabo meesa a cisumbishidi, wambula cintu ne ucileeja kânà kaa balume aku; kavwa anu kacya kaalengama. Ki paanyima paa katanci, kwambulaye kangonga kakese e kubanga kukadidisha, kadi kânà kaa balume aku nkacya anu kaalengama. Ki kubangaye kwela mbila mikole, ukupa byanza muulu. Kadi bantu bavwa mu makajiinyi amu bavwa anu kacya baamutangila, ki kuyabo kudiye bwa kumanya ne bwalu buvwa cinyi.

48 Yêyè ne: “Ndi ne . . . Mwanaanyi wa balume mutekete ewu,” yêyè ne, “ùcidi anu ne bidimu bisatu cyanaana.” Ki yêyè ne: “Ndi . . . Mbyenzeke dyakamwe ne, kukaadi bu cidimu cijima nanku, mmubange anu ùkaadi musômbe kacya walengamina mu cibwashibwashi.” Ki yêyè ne: “Mêmè—mêmè kuya nende kwa ngangabuka,” ne, “ngangabuka kufundaye manga kampanda ne bikwabo.” Ki yêyè ne: “Kadi ngangabuka mmungambile, leelu ewu, ne bwende yêyè mwânà ùkaadi mumvwe bilenga. Kadi,” yêyè ne, “kêna anu bîmpè to.” Yêyè ne: “Ndi munyukushe mwine bintu byônsò kumpala kwende, bidi ne cya kukoka ntema

yende, ntema ya mwânà wa bukole bwende ebu abi. Byônsò bidi bifwanyineku kukoka ntema ya mwânà wa bukole bwende ebu abi, mubinyukushe kumpala kwende, kadi yêyè mmushaale anu musòmbe kacya walengamina mu cibwashibwashi.” Yêyè ne: “Kêna bîmpè to.”

⁴⁹ Aci ncintu cifwanangane ne ekeleeziya wa Mpenta. Nzambi mmunyukushe dipà ne dipà dyônsò, mu Bible, kumpala kwabo, kadi bôbò mbasòmbe kacya anu baalengamina mu cibwashibwashi, byenze anu bu ne kùvwa cintu kaciyi mu cyôci to. Dîbà dyákànyì dya twètù kutabuluka, balunda baanyi, kumpala kwa dîbà kwikaladi dimane kupita. Vulukaayi ne, Nzambi kêna unyukusha mapà awu padiYe kayi uteeta bwa kukoka ntema yenu to.

Nzambi uvwa munkaci mwa kupatula ditunga mu ditunga.

⁵⁰ Anu mudiYe munkaci mwa kwenza mpindyewu, neapatule Mukaji musela mu ekeleeziya, ushiya bashààdilè baa ku dimiinu dya mukaji. Basungula nebapatudiibwe mu ekeleeziya. Ekeleeziya wa mu mubidi neashaale apa bwa kupicila mu dikenga dinene. *Basungula* abu badi mîngà misangu babiikidiibwa ne “basobola, basungula, badi bashaale.”

⁵¹ Tutangilaayi mwakenzaYe bwalu abu musangu awu, bwalu Yêyè katu ushintulula mushindu Wende wa dyenza maalu to. Nzambi utu ne mushindu umpwepele wa dyenza bintu, ne mushindu awu mene ngudiYe ubyenza, ne ki mushindu mujaalame ngwôwò awu, misangu yônsò. Monaayi mwàkacyènzàYe, ne mushindu wàkacyènzàYe, ne dîbà adi tudi mwa kudyanjila kumona eci.

⁵² Mpindyewu, mêmè ntu mulongeshi wa ne bifwanyikijilu, cya bushùwà. Ncyèna ne kalaasa kândi mulonge to. Bikengela ntape disù paanyima mmone cikaadiYe mwenze. Ne twètù tutu bayiile ne: “Dipungila Dikulukulu divwa mmundidimbi wa maalu adi ne cya kulwa.” Pa nanku mêmè mutangile apa nciyiku mumone cyanza cyanyi, kadi mumone mundidimbi wa cyanza cyanyi, ne mêmè mwikale ne minu yitaanu, ndi mufwanyine kwikalaku ne cingenyinyenyi cîmpè cya ne piikalà cyanza cyanyi mwa kufika mwaba awu, mvwa ne minu yitaanu. Pa nanku cyàkabènzekelà bôbò aci civwa mbileejilu bya mudi Nzambi wenza maalu, mushindu udiYe ùenza mpindyewu.

⁵³ Ne mushindu udiYe ùenza, katu Yêyè ushintuluka umukaku to. Musangu wônsò, mu Bible, Katu ushintululaku mushindu Wende wa dyenza maalu to. Mmushindu umweumwe awu ku musangu ne ku musangu, bwalu mushindu Wende wa kumpala wa kucyenza mmushindu mupwangane. Bwalu, Yêyè kî mmufwanyineku kwikala ne mushindu mukwabo to, bwalu Yêyè mmupwangane, nenku, Yêyè, mishindu Yende yônsò mmipwangane. Tangilaayi numone mwàkacyènzàYe.

54 Mòsà uvwa mubiikila ne mudyanjila kuteeka bwa yêye kwangata mudimu ewu, uvwaye—uvwaye mwangate ewu. Nzambi. . .

55 Mpindyewu, ndi ngeela meeji ne, bu nwênù mwa kufwaku luse bwalu ebu. . . Ncyêna ngamba bwalu ebu bu ne ncyêna mwele meeji to. Ndi ngamba anu ne, mu cyambilu emu, ncyêna—ncyêna mumanye cintu to ne ncyêna muswe kumanya cintu to pa kuumusha Nzambi. Mpindyewu, ngeela meeji ne ki mwaba awu udi bânà beetu beena Mvula Mishiishe bapetele cibwejàkàji, nwamonu's, badi batentekelangana byanza ne bavwijangana bapofeta ne bikwabo. Mpindyewu, aci kî ncyá mu Mifundu nansha. “Mapà ne mabiikila kî mbya dinyingalala to.” Wêwè udi mulediibwe cyûdi cyônso aci. Udi, ku cibangidilu, cyûdi aci.

56 Tangilaayi Bafaalesa abu mu matuku a kale àa. Bavwa anu ne ndambu mukese wa bukênkè cyanaana, bwalu bavwa mwa. . . bavwa ne mikenji, ne bavwa ne mwoyi ku mikenji ayi, kadi munda mwa mwoyi wabo muvwa mufiike anu fitutuu.

57 Kadi kuvwa mukaji mukese kampanda, ndumba, wende nsòmb. . . nsòmbelu uvwaye nende kumpala *apa* uvwa mufiike anu fitutuu, ùvwa wa luumu lubi, kadi munda mwa mwoyi wende ùvwa mudyanjila kulongolwela Mwoyi.

58 Nenku pashiishe pààkalwà Yesu, Diyì, kumata mu cyalu, Bafaalesa abu baakamba ne: “Ewu Muntu m'Beelezebula.” Cyakenza cinyi? Cyakafiikisha ne kiine kaabukênkè kakese kavwabo naaku aku.

59 Yesu kwamba ne: “Nudi baa tatwênù, dyabulu, ne midimu yende nyinudi nwenza eyi.”

60 Kadi kakaji kaa nsòmbelu mukooyike aka, nkenze anu kafika, kamona anu Diyì dya Nzambi anyi, kòkò kuDimanya. Kakavwa kaDyenza mu nsòmbelu to, kadi kavwa kaDimanye. Nenku Dyôdi ndyenze anu dyakula naaku anyi, kwambaku ne: “Ndi njingulula ne Wêwè ewu udi Muprofeta.” Nenku Yêyè. . . Kòkò kwamba ne: “Ndi mumanye ne Maasiya ki wíkala mwa kwenza eci.”

Ki Yêyè kwamba ne: “Mémè ki Yêyè awu.”

61 Cyakenza cinyi? Cyakakupula mîdimà ayi ne kuyivwija yônso mitooke. Bwa cinyi? Kuvwa dimiinu diteeka mwaba awu, dimiinu didyanjila kulongolola divwà mu. . . Divwa meeji a Nzambi kumpala kwa difuka dya dyulu ne buloba.

62 Kudi mushindu wa Mwoyi wa Cyendeleele anu umwepele. Pawikala ne Mwoyi wa Cyendeleele, nanku wêwè mwine uvwa mu meeji a Nzambi kumpala kwa dyulu ne buloba kufukiibwabi. Wêwè udi cyambiibwa cya meeji Ende, bwalu cya Cyendeleele kacituku cyanji kubanga ne kacadyakwikala ne ndekeelu to. Udi citupa cya cibucilu cya Nzambi, misangu yônso. Cidi anu cidileeja mu cimfwanyi. Cidi cyenda cishaala nanku mpindyewu.

Badi ne fòtò mukwabo wa kusukula, ndufu, dîbà adi ciibùlòjì cidi cishaala cintu ciine, dîbà adi udi mu Mukaji-musela ne pamwe ne Kilisto, bu mwakeelaYe meeji. Bu mudi mulume ne mukajende, leelu ewu, pa nanku Nzambi, Kilisto ne Ekeleeziya nebiikale cintu cimwe. Mpindyewu, musungula, mubiikila!

Môsà wakalediibwa, “mwânà wa mulenga kumona.”

⁶³ Bible mmwambe, ne, umwe wa ku baprofeta, Yelemiya, Nzambi wakamba ne: “Kumpala kwa wêwè kudivunga munda mwa mamwébè, nkaavwa mukuteeke bu muprofeta wa bisamba.”

⁶⁴ Yone Mubatiiji, mona’s, uvwa mumanyishiibwe mu Mifundu. Yeshaayi, bidimu nkama mwandamutekete ne dikumi ne bibidi kumpala kwa dilwa dyende, wakamba ne: “Yèyè udi dîyi didi dyela lubila mu cipeela ne: ‘Longololaayi njila wa Mukalenge!’” Ne bidimu bitwe ku nkama yinaayi kumpala kwa dimweneka dyende, tudi tusangana kabidi ne, Maalaki wakamba ne: “Monaayi ne Ndi ntuma musanjeela Wanyi kumpala Kwanyi, bwa kulongolola njila kumpala kwa Mukalenge.”

⁶⁵ Nwamonu’s, ùkaavwa mudyanjila kuteeka. Ne ki muvwa kabidi midimu yònsò ya Nzambi ayi, piikalabo ne mbabùikila kudi Nzambi.

⁶⁶ Piikalabo bababwejemu ku dilonga dya tulaasa, aci cidi anu tuzoolo twa kumana naatu mikiiya, nwamonu’s, kaciyena mwa kwikala cintu ciine to. Piikalaci ne nkwebe kùdì udiila, dîbà adi udi upaanyisha bwanaabute bwebe ku cyakudya, neudye cibanga bwà kuya ne bulongolodi kampanda anyi ne kasumbu kampanda. Kadi piikalaci cya kudi Nzambi, neutwe Dîyì adi nyama ku mikolo, nansha bya munyi, bwalu wâkalediibwa bwa kuDitwa nyama ku mikolo.

⁶⁷ Mòsà, muntu mukwabo nansha umwe kavwaku mufwanyine kwangata kaaba kende to. Muntu mukwabo nansha umwe kavwaku mufwanyine kwenza mudimu awu to. Yèyè nguvwa muteekiibwe bwa kuwenza.

⁶⁸ Nenku, bânà beetu baa balume, mwaneetu wa bakaji, pawikala ne Mwoyi wa Cyendelele, uvwa muteekibwe bwa kwenza cintu kampanda. Pàmwápa mukaji wa nzubu mulenga, pàmwápa cintu kampanda cikwabo, kadi muntu nansha umwe kêna mwa kwangataku kaaba keebe to. Nzambi mmukwenzele kaaba. Kukebi bwa kwangata kaaba kaa muntu mukwabo to. Aci nditentula dya mu musunya, wamonu’s, bileeja ne kudi cintu kampanda cipampalamuke mu wêwè amu. Ikala cyùdi aci, anu menemene. Kwikadi cîngà cintu nansha cimwe to.

⁶⁹ Mpindyewu, mpindyewu tudi tusangana ne Nzambi wakapa Mòsà bimanyinu bwa kujaadika madyambi ne mabiikila.

⁷⁰ Ne cimanyinu cilelela cyònsò, cimanyinu cilelela cyònsò, cituma kudi Nzambi, cidi...citu ne dîyi paanyima paaci.

Mpindyewu kanupangi kucikwata to. Edi ndileesona dyanyi dya ndekeelu pa bwalu ebu, nwamonu's. Cimanyinu cilelela cyônsò. . . Mpindyewu tudi ne bimanyinu bidi kabiyi bya kudi Nzambi to; Sataana udi mwa kutentula pabwîpi ne cintu cyônsò cidiku eci. Kadi cimanyinu cilelela, cituma kudi Nzambi, cidi ne Dìyì dya Nzambi paanyima paaci.

⁷¹ Nzambi wakambila Mòsà ne: “Paabengabo kwitabuujja dîyì dya cimanyinu cya kumpala, dîbà adi wénzè cimanyinu cikwabo eci kumpala kwabo. Nenku pashiishe paabengabo kuteeleja aci, angata anu màyi ùàpòngòlòlè panshi.” Nenku aci civwa ncimanyinu cya ne bavwa bashaala babole bolebole ne mashi abo bôbò biine mwaba awu.

⁷² Monaayi, biikàle anu bya mwomumwe paakambaYe ne: “Nùtuutulè lupwishi lwa ku makàsà enu. Mbifwanyine kutwadiibwa bwa Sodoma ne Gomola, mu dituku adi, kupita mwikalabi bwa cimenga cyanubenga aci.”

⁷³ Mpindyewu ekeleeziya kî *mmanayi* twenza to, eci *ki* Ekeleeziya. Kilisto ki Ekeleeziya. Twètù tudi munda mwa Kilisto. Mubidi musokome wa Kilisto, tudi balediibweMu. Kwèna mwa kukashààla wa ku Wôwò to.

⁷⁴ Ndi wa mu famiye wa beena Branham kukaadi bidimu bitwe ku makumi ataanu ne bitaanu, nenku kabàvwakù bandòmba bwa mèmè kushaala mwena famiye awu to. Ntu mulediibwe mwikale Branham.

⁷⁵ Nenku mushindu awu ngùdì mwena Kilisto. Wèwè udi mwena Kilisto nku dilediibwa, kuyi mukadilamikemu to. Udi mulediibwemu. Bantu bônsò badi baciina dilediibwa. Badi ne mushindu kampanda wa mwîmpè ne mukezuke wa kwangata dilabulangana dikese dya ku cyanza, anyi wa kutwa cyâlà pa karta kakese, anyi kakopo kaa mukele kiikale ne màyi munda. Dilediibwa kî ng'aci to. Dilediibwa ncintu cya cikwacisha bwôwà. Dilediibwa ncintu cibi—cibi kumona. Nansha cyenzèkèle mu cikumbi cya ngulube, anyi mu—anyì mu kaaba kaa nyama mu diyeeba, anyi mu cibambalu cya dileleshilangana cya lupitaadi cilengeja ne bilòngò bya diikala dikunzubile; dileediibwa mbukooya, ne didi dikuvwija bukooya. Kwèna uswa kubilekela to, kwèna uswa *cikampanda*, *cikansanga*, anyi *cikankenga* to, kadi binsonji ki byàkukùpulà bilaabu kwîsù ne kukuvwija muntu mushiilangane. Wèwè mulediibwe cyakabidi, nebikuvwije bukooya, kadi neulwe cifukiibwa cipyacipyà. Wamonu anyi? Bôbò kî mbaswe aci to. Mbaswe mushindu kampanda wa mupeepele, nudi bamanye's, kadi kwôkò kwine kakwena mishindu ya mipeepele to. Bu mudi musambu awu, mmwambe ne: “Nëndondè njila pamwe ne banyààbanyà badyombola baa Mukalenge.” Kî mmuswe kwikala mucì mutenteka to.

Cimanyinu cya bushùwà cyònsò cya Nzambi batu bacilonda kudi Dìyi dya Nzambi.

⁷⁶ Mpindyewu muntu yêyè mufile cimanyinu mu ditunga, anyi dîbà kana dyònsò, ne piikàla dîyi adi didiye wamba paanyima paa cyòci aci adi kadiyi Dìyi dya Nzambi to, dîbà adi nwaditangilaayi bîmpè, kanùdītābūūjīku to. Piikàla cilongelu kampanda cya kale, muntu yêyè mujuuke wamba, uleeja cimanyinu cya kudi Nzambi, kadi dilongesha dya muntu awu diikàle anu teoloji umwèumwè unutu nende bidimu byònsò ebi awu, kî Nzambi udi mutume aci cimanyinu to. Alujaayi mèsu mu Mifundu numonebi ní bìdi nànkū. Kenketaayi mu Mifundu. Mulumyana awu walukila, wamba ne: “Mpindyewu tudi bònsò baswe kushaala beena *cikampanda*. S’ncintu cya kale cidi ciimanyika.” Kanwitabuujiku aci to. Netubwele mu cyòci aci, mu tusunsa tukese cyanaana, nwamonu’s. To, kanwitabuujiku aci to.

⁷⁷ Nzambi utu misangu yònsò anu ushindika bimanyinu Byende. Cimanyinu cya kudi Nzambi citu misangu yònsò anu cijikula Dìyi dya Nzambi.

⁷⁸ Kadi cyòci ciikàle anu cilongelu cimwecimwe cya kale cinuvwa naaci aci, Yêyè mmufwanyine kufila cimanyinu bwa cinyi? S’nyawu nukaadimu. Yêyè udi uteeta bwa kunufikisha ku ditumba dyadya. Cimanyinu cya diimanyika! Tekesha lubilu! Tangila kúyaayà aku! Neúdyélé mu ditumba mwamwa paudi kuyi utangila bîmpè to. Kudi cibenda cya cìmpicìmpi, nenku kutu misangu yònsò anu cimanyinu kumpala kwa wêwè kwela cibenda eci, bwa kukwepula ku dyenza dya njiwu. Benji bîmpè baa njila batu bafila bimanyinu. Kadi twètù tudi mu lwendu mu njila wa ku Butumbi. Kadi cimanyinu cyòci cyakula cyamba cintu cimwecimwe cya kale aci, kacivwa cya kudi Nzambi to.

⁷⁹ Nzambi utu ufila bimanyinu bwa kukoka ntema ya bantu Bende. Bimanyinu bitu mbwa kukoka ntema ya bantu baa Nzambi, ki bimanyinu bya Nzambi abi. Bimanyinu bya Nzambi bitu bifidiibwe mbwa kukoka ntema ya bantu baa Nzambi.

⁸⁰ Mpindyewu apa cipuka cya cilakuka kapyā aci civwa ncimanyinu bwa kukoka ntema ya muprofeta, citeeta, bwalu muprofeta awu uvwa munyeeme Nzambi, ki Nzambi kufila cipuka cya cilakuka kapyā bu cimanyinu. Ki yêyè kumona cimanyinu cya cikemesha eci; ki yêyè ne: “Néncingulukè bwa kumona ne eci cimanyinu cya cikemesha ncinyi, cya ne ci—cipuka cidi cilakuka kapyā kadi kacyi cibutuka.” Mpindyewu Nzambi nguvwa ukoka ntema ya muprofeta Wende uvwa munyeeme awu. Yêyè uvwa anu mwa kwikala mwangate muntu mukwabo, kadi Ūkaavwa mumane kuteeka Mòsà bwa mudimu awu ne muntu mukwabo kaakwangataku kaaba kende to.

⁸¹ Mu lwendu alu, bamwe bantu baakateeta kucyenza, nudi bamanye’s. Datana kuujuka mwikale ukeba kuwuwija

bulongolodi. Nzambi kwambila Mòsà ne: “Tapuluka. Mémè nêmbàminè anu cyanaana.” Nwamonu anyi?

⁸² Nzambi utu ukwata mudimu ne muntu nkaaya. Nwamonu anyi? Mpindyewu monaayi eci, Yèyè uvwa ukeba bwa kukoka ntema ya muprofeta, bwa kuteeka muprofeta pa kaaba kende kavwa kakengediibwa, nwamonu’s, ki Yèyè kufila cimanyinu cya cipuka cya cilakuka kapya.

⁸³ Nenu, monaayi, Dîyì dyàkalondà cimanyinu divwa n’Dîyì dya mu Mifundu. “Ngǔmvù mbila ya bantu Baanyi, ne mikemu yabo, bwalu bwa babenzeji baa midimu mikole abu, nenu Ngǎvùluku mulayi Wanyi.” Amen. Aci’s ncikose bwalu. “Ngǎvùluku mulayi.” Aci’s civwa n’Dîyì dya mu Mifundu. “Nenu Ndi nkutumamu wèwè. Ndi mutuuluke bwa Mémè kubasungila, kadi Ndi nkutuma wèwè.”

⁸⁴ Vulukaayi ne, Nzambi katu wenza cintu nansha cimwe kakuyi muntu to. Nudi bamanye aci anyi? Ki cyòci aci cidi cilendwisha bantu. Nwamonu anyi?

⁸⁵ Ki cyàkabàlèndwishà pa bìvwà bitangila Yesu. Kwambabo ne: “Wèwè udi Muntu, uDìvwija Nzambi.” Yèyè uvwa Nzambi, kadi bôbò kabavwa mwa kucyumvwa to. “Ee, Wèwè, mwikale anu Muntu wetu ewu.”

⁸⁶ Yèyè kwamba ne: “Ee, nwênù’s nutu nubiiikila baprofeta ne, ‘mbanzambi,’ ne mikenji yenu yitaba ciine aci. Nenu panwikala nubabiikila bôbò abu ne ‘mbanzambi,’ bôbò abu bavwa Dîyì dya Nzambi dilwa kudibo, mmunyi munudi mwa kumpiisha Mémè pândi ngamba ne Ndi Mwànà wa Nzambi?”

⁸⁷ Nwamonu’s, bimanyinu, bwa kukoka ntema. Nenu, vulukaayi ne, piikalà ntema mikokiibwe kadi biikàle anu bintu bimwebimwe bya kale abi, kî n’Nzambi to.

⁸⁸ Kadi Nzambi udi munkaci mwa kukoka ntema ya muprofeta ewu mpindyewu, ne Ùdi umupa cimanyinu, ne Dîyì dyàkalondà cimanyinu aci divwa n’Dîyì dya mu Mifundu. “Ngámònu cisamba. Ngǔmvù mbila yabo. Ngǎvùluku mulayi Wanyi.”

⁸⁹ Mpindyewu Nzambi neakule ku Dîyì Dyende dilaya. Ùdi ne cya kutuma muprofeta Wende, bwalu Dîyì ditu dilwa kudi muprofeta. Bible mmwambe, Nzambi ngudi mwambe, Yèyè mwine, ne: “Yèyè kèna wenza cintu nansha cimwe kayi Wanji kucibuulwila dyambedi basadidi Bende baprofeta to.” Nwamonu anyi? Nenu dîbà adi, cimanyinu ncifidiibwe, ne Mufundu mmujaadikiibwe, ki Dîyì dya cimanyinu ndyòdi adi.

⁹⁰ Nwamonu Dîyì dya cimanyinu, dya Mòsà anyi? Dyambedi, cimanyinu civwa ncipuka cya cilakuka kapya; Dîyì divwa m’Mufundu.

⁹¹ Mòsà kwangataye aci bu cimanyinu Cyende, ne wakaya mu Ejipitu ne wakenza cimanyinu cyàkamwambilà Nzambi; ne cimanyinu aci civwa ne Dîyì diikaleku, ne bantu baakiitabuuja

ne baakatuka. Nunku pavwabo benda baya, apu kaayi bavwa anu bilenga; kadi paakabangabo kunungana baakula bibi bwa Dîyì, dîbà adi baakiimana.

⁹² Vulukaayi ne, Izaleela uvwa mu lwendu. Nuvwa bamanye bule bwa njila wâkenzabò? Nunku bavwa... Bavwa anu mu ntanta wa kilomeeta makumi asambombo ne yinaayi cyanaana, kadi bàakayènza munda mwa bidimu bitwe ku makumi anaayi. Bwa cinyi? Mbwalu baakabanga kunungana baakula bibi bwa Dîyì divwa ditwale cimanyinu. Mushindu mwine uvwabo kabayi batambe kumanya, pavwabo beela mbila lwà kwinsi kwaka ku mwelelu wa mâyi apu, baja maja mu Nyuma, ne Mòsà wimba mu Nyuma, paabo's bavwa anu mu ntanta wa matuku makese menemene. Kadi kubangabo kunungana, bajinga kwenza cintu kampanda cya cishiilangane; ki kushaalabo bidimu makumi anaayi mu cipeela, kumûfwilabò bwa bwalu abu, ncyà bushùwà's, bwalu kabaakiitabuujà to. Nzambi wakamba ne: "Udibo banungeena kî ngwêwè to, Mòsà. Udibo wamba bibi m'Mémè." Civwa n'Dîyì dya Nzambi, kacivwa Mòsà to.

⁹³ Mpindyewu tangilaayi, Yehowah neakule ku Dîyì Dyende dilaya, pa nanku Ûdi ne cya kutuma baprofeta Bende. Aci, panudi baswe kucimona, mmu Genese 15.16. Tudi tusangana ne Nzambi wakambila Abraham ne: "Dimiinu dyebe nediikale dyenyi mu buloba bwenyi ebu, ne Mémè nêmbàpâtùlè ne diboko dya bukole. Bubi bwa beena Amola kî mbwanji kuula tente to." Milayi Yende yònsò yakafilaYe ayi, ki Yèyè ewu ukoka muprofeta, ku cipuka cya cilakuka kapyà.

⁹⁴ Mpindyewu bu cipuka cya cilakuka kapyà aci mwa kwikala cyambe ne: "Mòsà, Nzambi udi Nzambi."

"Eyo, ndi ngiitabuujà nanku."

⁹⁵ "Kaa, udi wenza bîmpè, Mòsà, tungunuka anu naaci nanku. Udi musele mukaji mwîmpè; mmwânà mulenga kwîsù. Ncyà bushùwà ne udi mupete mwânà wa balume mwîmpè! Butumbi kudi Nzambi's we!" Aci's ncilongelu anu cimwecimwe cya kale aci. Nwamonu anyi?

⁹⁶ Kadi Yèyè uvwa pabwîpì ne kwenza cintu kampanda, pa nanku bivwa bikengela Yèyè kukoka muntu awu. Ki Yèyè kupa muntu awu bimanyinu bibidi bya kwenzaye, wamba ne: "Cimanyinu cyònsò civwa ne Dîyì." S'ki cidi cijaadika ne mmwômò. Mpindyewu tangilaayi cyâkambà Méyì awu, âkafûka ne difuka. Yehowah uvwa pabwîpì ne kwakula mpindyewu.

⁹⁷ Kabidi, dilwa dya muprofeta ditu ncimanyinu. Nuvwaku bamanye nanku anyi? Dilwa dya muprofeta, bwa cikondo, ditu ncimanyinu.

⁹⁸ Mpindyewu ncyêna nswa kwamba dilwa dya Docteur mu Bunzambi to. Ncyêna nswa kwamba dilwa dya mpaasata

kampanda udi uneemeka bidiye wamba, dya muntu mwîmpè kampanda to. Abu badi anu bîmpè. Abu mbasadidi baa Nzambi.

⁹⁹ Kadi muprofeta utu ncimanyinu. Ncidi Bible wamba mwaba ewu. Kadi ncimanyinu cya cinyi? Ncimanyinu cya ne Dîyì Dyende dikaadi pabwîpì ne kuula, kuujiibwa ku Dîyì dya cimanyinu cya yêyè muprofeta ewu.

¹⁰⁰ Monaayi, dilwa dya muprofeta ditu ncimanyinu cya didimwija bwa dilumbulwisha didi pabwîpì. Nuvwaku bamanye nanku anyi? Dilumbulwisha didi pabwîpì ne kudikuma kwôkò kwikàle muprofeta pa buloba.

¹⁰¹ Vulukaayi ne, ncya bushùwà ne, dyambedi, bikengela yêyè ànjì kushindikiiibwa kudi Nzambi ne Dîyì bwa dituku adi, ne pashiishe udi wenza cimanyinu. Nenuku nutangilaayi ciine cimanyinu aci, cidiye uduyanjila kwamba ciine. Wakamba ne: “Cyôcì cyenzeke, nanku numuteelejaayi.” Nomba 12.6. “Cyôcì kaciyi cyenzeke to, nucipwe mwoyi.” Bidi bikengela cìikalè cimanyinu cya mu Mifundu cidiYe ufila.

¹⁰² Nenuku cyakafilaYe bu cimanyinu, musangu kampanda, piikalaYe umwèumwè awu makeelela, leelu, too ne kashidi, Ûdi ucifila mushindu umwecimwe awu ku musangu ne ku musangu. “Dîyì dya Mukalenge divwa dilwa kudi baprofeta.” Bôbò bavwa Dîyì. Ne pààkalwà Yesu, Ûvwa Dîyì. Ne Dîyì divwa dijingulula meeji ne mapangadika a mu mwoyi, ku musangu ne ku musangu, anu nanku anu nanku. Mpindyewu tangilaayi.

¹⁰³ Dilwa dya muprofeta ewu, didi difila cimanyinu, cya ne, “dilumbulwisha didi pabwîpì,” misangu yònsò.

¹⁰⁴ Twănji twimanaayi anu bwa tusunsa tukese cyanaana. Ncyakwangata dibà dipitepite bûngì to. Twănji tukenketaayi anu bakesè cyanaana mpindyewu, mu tusunsa tutwe ku dikumi. Anyi, ne citupa cya diyisha cidi cishaale, mu tusunsa dikumi.

¹⁰⁵ Noa, muprofeta pa buloba—pa buloba, cimanyinu cya dilumbulwisha divwà dilwa. Mòsà, muprofeta pa buloba, cimanyinu cya dilumbulwisha divwà dilwa. Eliya, muprofeta pa buloba, cimanyinu cya dilumbulwisha divwà dilwa. Yone, muprofeta pa buloba, cimanyinu cya dilumbulwisha divwà dilwila Izaleela; kakuyi mpatà to bavwa anu babapangisha.

¹⁰⁶ Monaayi, cimanyinu! Cimanyinu cidi cyenza cinyi? Cimanyinu mbwa kukoka ntema, ne kufikisha basungula ku diikala badilongolole, ne kuumuka mu njila kumpala kwa dilumbulwisha kudikumadi. Ki cyàkenzà Noa, wakalongolola basungula. Bwa bakwabo, nenku cidi cyenza cinyi? Cimanyinu, ne Dîyì dya cimanyinu, didi dipiisha mwena bupidya ne dimulongolola ku dilumbulwisha. Didi dilongolola musungula ku dipanduka. Ki cidi cimanyinu. Ki bwa cinyi bimanyinu bidi bifidiibwa, bwa dilumbulwisha dilwalwà. Bwa basungula bôbò, badi bacimona.

107 Bu mukaji mutekete wa mwoyi mukezuke, ne mubidi mukooyike awu; ne Mufaalesa mwikale ne mubidi mukezuke, kadi ne mwoyi mukooyike. Cyakapiisha umwe, kadi kusungila mukwabo.

108 Nenku dilumbulwisha diine dyàkasùngilà Mòsà adi, dyôdi adi ndyakapiisha baa pa buloba; diyiisha dyende adi.

109 Cidi cilongolola basungula. Basungula mbadilongolole ku cinyi? Padibo bamona cimanyinu cifila kudi Nzambi, badi bapingaja mèsù paanyima mu Mifundu nenku bamona ní cyôci aci ncidi ne cya kwikalaku. “Eyo, ncyôci eci.” Ncinyi ciine aci? Dilumbulwisha dilembelele. Dîbà adi musungula udi uteeleja Dîyì.

110 Kadi udi kayi musungula udi ulengulula, wamba ne: “Bintu bya cyanaana. Tungunukaayi! Twêtù netwangate anu cilongelu cyetu cimwecimwe cya kale aci.” Nwamonu anyi? Ki mwakenzabo mu matuku a Luther. Ki mwakenzabo mu matuku a Wesley. Ki mùdìbo—mùdìbo benza mpindyewu, mukaadibo benzenze misangu yònsò.

111 Kadi ncimanyinu, ne cidi ne Dîyì dîdì dîlondà cimanyinu. Ne Dîyì adi ndijaadikiibwe bu Dîyì dya mu Mifundu. Mpindyewu kanupu aci mwoyi to. Mpindyewu lekelaayi aci citungunuka ànu ne kunùbwela, bwalu bidi mwa kwenzeka ne ncinùmonukù kabidi to.

112 Bu ngîkalakù ne mushindu wa mêmè kupweka muneemu emu mwaba kampanda ne kwangata bâna beetu bònsò, dîbà diikalabo kabayi ne matabuluja miikàle enzeka to, kwasa ntenta kadi kusòmba anu naka, ku dituku ku dituku, kadi kucilongesha too—too ne padici cibwela cibwelelamu. Kadi Yèyè kî mmufwanyine kwanyishaku aci to, mùndi ngeela meeji. Nwamonu’s, tukaadi pabwîpi menemene ne nshiikidilu. Ndi mêmè ngiitabuuja ne tudi mpindyewu anu kunshiikidilu mene.

113 Mu mukanda wanyi muntu mwamwa, mùndi mulame maalu mafundamu. Mu cidimu cya 1933, mu dinda kampanda, mwikàle ndilongolola bwa kuya mu kalaasa kaa Dyalumingu, kalaasa kaa Dyalumingu kaa ba-Baptistes mùmvwà mpaasata, Nyuma Mwîmpè kulwa kundeeja maalu too ne ku cikondo cya kunshiikidilu, kundeeja bintu mwandamutekete bivwa mwa kwenzeka. Mêmè kubifunda. Bidi pa dibeji dya kale dya kalaabi.

114 Yèyè kungambila anu menemene muvwa Allemagne mwa kwibaka lumbu lwa Siegfried Line alu, ne muvwa beena Amerike mwa kudyaku mutuutu wà kalum’a mutuutu mwaba awu, bidimu dikumi ne cimwe kumpala kwa—kwa lumbu alu kwibakiibwalu.

115 Kwamba muvwa Mussolini mwa kujuuka, ne muvwaye mwa kuya mu Éthiopie, ne muvwa Éthiopie mwa “kupona ku makàsà ende.” Ne muvwaye mwa kufwa lufu lwa bundu, mwele katungu, ne bantu bende biine bamutwila mata.

116 Nenku mêmè kwamba ne: “Kudi tusumbu tusatu: Communisme, Fascisme, ne Nazisme. Netukadisange twònsò mu Russie, mu Communisme.” Ne yêyè ewu ki wíkala Kat- . . . ki wabutula cyena Katolike. Numonaayi ní kèna ucyenza!

117 Mêmè kwamba ne: “Ditanta dya menemene nedyenzeke!” Mêmè kwamba ne: “Ndi mmona tushinyi tufwanangane ne diyi, twènda tûpweka mu mùsèèsù. Kudi tushinyi twènda tûpweka mu bibeeba, twikàle ne bukontononyi bwa mushindu kampanda, kabiyi bikengela bwa batwendesha ne yèndà to. Mêmè kumòna famiye kampanda wa beena Amerike munkaci mwa kuya benda banaya checker lwà paanyima paa kashinyi aku.” Bakaadi ne kashinyi aku patudi twakulangana apa, bu bòbò anu mwa kwikala ne bibeeba bya kukateekamu’s. Kashinyi kakese kaa VW aka’s ndiyi mu bupwangane bwadi, anu dyòdi menemene, ne ki mudiku ku tushinyi tukwabo twònsò etu. Nudiku mwa kudifwanyikijila, mu cidimu cya 1933 mwine amu, mmwenekelu uvwa nende tushinyi, ne wa twa mpindyewu etu anyi?

118 Nenku pashiishe Cyôcì kudyanjila kwamba kabidi, ne, dyanyishila dya bakaji bwa kwenzabo masungulangana, ne civwabo mwa kwenza. Ne muvwa ditunga edi, diikàle cifwanyikijilu, difwanangane ne Izaleela, kufika mu buloba kampanda kadi kwipata beena kalaba, kadi kupyanabo buloba abu. Ne bamfumu bakese ba ku mbangilu baakapetabo, Davidi ne Solomo, bàvwa bamfumu bàvwà baciina Nzambi. Paanyima paa cikondo kampanda, kupetabo Aakaba mu cyalu. Bòbò kumwelela tukanda ne kumusungulabo. Nkwasa neikale ne . . . ekeleeziya kushaalaye ne ngiikadilu wa maalu a pa buloba. Nenku, twètù kupeta Lincoln ne Washington, monaayi cikaadi ditunga leelu ewu. Tangilaayi numone kutukaadi twenda tuya mpindyewu. Cintu cyàlondà ncinyi? Tukaadi ku cikondo cya kunshiikidilu.

119 Nenku ncimanyinu, mu mubidi emu, anu menemene. Cidi cifikisha basungula ku didilongolola; ne cidi cipiisha, ku dilumbulwisha, mwena bupidya.

120 “Muprofeta ewu yêyè muprofeta mulelela, ne cidiye wamba ciikàle cyènzeka,” Bible mmwambe, mu Nomba 12.6 ne, “nuteeleje didimwija dyende, bwalu mbishindikiibwe ne kî mmuntu awu to.” Mu—muprofeta yêyè mmuntu. Kadi Dîyì didi difùminà ku cimanyinu citambe mfukilu adi n’Dîyì dya mu Mifundu, ndishindikiibwe, nanku ndidimwija.

121 Bible wakafundiibwa kudi baprofeta, nwavulukaayi. Mu Peetelo Mwibîdì, kabidi, 1.21. Kabidi, mu Ebelu 1.1.

122 Dikunji dya Kapyà, bwa Mòsà, divwa ncimanyinu, Dîyì divwa dilwa kwakula. Dikunji dya Kapyà divwa dileeja ne Dîyì divwa dilwa kwakula. Ki cimanyinu ncyôcì aci, Dikunji dya Kapyà. Nwènù bivwa bikengela nwavulukaayi bwalu bwa ku Houston abu, kî nkwanji kwenza ntanta to.

123 Mòsà, muprofeta, cimanyinu kudi Izaleela, cya ne mulayi ukaavwa pabwipi menemene ne kuula. Pàakapwekà Mòsà ne kwenzaye cimanyinu cya muprofeta, ki kumanyabo anu mwaba awu ne yêyè uvwa ne cya kubasanga kaaba kamwe.

124 Mushindu mwine udi Dîyi dya Nzambi dipwangane mu bulongame, musangu wònsò anu dimwedimwe adi. Nansha mene mûndi mwambe makeelela diloolo, mushindu uvwa Ulima Tuumima, ne bikwabo byònsò, byandamunandamune misangu yònsò kudi Nzambi.

125 Twangataayi kabidi muprofeta kampana, katanci kakese cyanaana, Yona. Mwawa mufunde nshapita 1 wa Yona mwaba ewu, nshapita 1 mwaba ewu wa ciprofeta cyende. Yona upatuka mu difu dya mushipa wa bàlenà, civwa ncimanyinu. Nwamonu's, bantu abu bavwa bampangaanu. Bavwa bakuukwila nzambi ya mu mbû, ne nzambi wabo wa mu mbû awu uvwa mmushipa wa bàlenà awu.

126 Mpindyewu bantu bààbûngì batu bakeba kupiisha Yona. Ntu mêmè misangu yònsò ntwà anu ku cya Yona. Yona kavwa mupatuke mu diswa dya Mukalenge to. "Makàsà a baakane atu malombola kudi Mukalenge." Tutu anu baswe kwambangana ne: "Yêyè's n'Yona's." Kadi twânji twangataayi bwalu ebu ku wabu. . .mushinga udibu naawu, musangu umwepele. Ndi mumanye ne yêyè uvwa ne cya kuya ku Niniwa, kadi Nzambi kumufikisha ku dyangata bwâtù bwa ku Taashishi abu. Ki kwenzaYe bwa ne lutatu lulwe pa mbû.

127 Yona kwambaye ne: "Nswikaayi byanza ne makàsà. Mêmè ngudi mu lutatu, ngudi mulukebe." Ki kumwelabo pambelu. Ke mushipa paawu wenda wowela mu mâyi, mushipa munene uvwa mumine Yona awu. Ndi mumanye ne aci mbikole bwa beena maalu a mamanya kuciitabuujabo.

128 Mwaba ewu anu abidi adi panshi aa, mu Louisville, Kentucky, kukaadi bidimu bitwe ku dikumi, bavwa bateeke mushipa wa—wa bàlenà bawulaadike pa—pa dikaadika dya ciibwashi. Nenu kuvwa kaalumangu kakwabo kaa ci-Ricky mwaba awu, kiikale ne dimanya dikàpite. Kavwa kajinga kuleeja ne Bible mmwambe cya mafi. Yêyè ne: "Nudi bamanye's, nutu anu nuumvwa lusumwinu lwa kale lwa mu Bible alu, lwa ne mushipa wa bàlenà wakamina Yona alu." Yêyè ne: "Monaayi, kakuvwa nansha mushindu wa kupicisha ndundu pa muminu wawu apu to, uvwa mukese be. Mmunyi muvwa muntu mukole wetu ewu mufwanyine kubwela mu difu dyawu?" Yêyè ne: "Nudi numona's, cidi anu ndusumwinu lwa kale, bu mudì Bible mûle tente ne miine nsumwinu ayi."

129 Aci civwa cimpicile bwa wanyi—wanyi ngeelelu wa meeji. Mêmè kwamba ne: "Mukalenge, ndi njingaku kwamba kantu mwaba awu."

Yêyè ne: "Cyûdì peebe naaci cya kwamba ki cinyi?"

130 Mémè ne: “Udi umona’s, wêwè ngudi kuyi mubale Bible bîmpè to.” Mémè ne: “Bible mmwambe ne ewu uvwa mmushipa wa bàlènà wa pabwawu. ‘Nzambi wakalongolola mushipa munene.’ Ewu uvwa mwibaka mu mushindu wa pabwawu, bwa kumuminawu, cyàkamufikisha ku dimumina! Kawuvwa mmushipa wetu wa ciibidilu ewu to. Nzambi uvwa ujinga kwenza mudimu wa pabwawu, pa nanku Yèyè kwangata mushipa wa pabwawu.” Nwamonu anyi? Dîbà adi kadi kushaalaye matama bu byâta pa bwalu abu’s. Pa nanku, aci, Nzambi uvwa ne cintu cya pabwaci.

131 Byenze bu kânà kaa bakaji kakwabo, musangu kampanda, kuumukila ku tabernacle; tusuki twaku twela cisaku tutuma paanyima, tufinunuja bilenga, mu mushindu wa ne mpala wende umweka anu bu ditungulu dyuvula. Úvwa ufuma ku dipeta Bible, wenda upweka.

132 Mukulumpe kampanda dînà dyende Jim Dorsey uvwa musòmbèle mu Utica. Úvwa mwena bupidya, musalaayi wa kale, nenku—nenku kavwa witabuuja Nzambi to. Ki yèyè ne: “Uyaaya kwèpi, wêwè mwâbânà?”

Yèyè ne: “Nyaaya mwetu, mukalenge.”

Yèyè ne: “Aci cyûdi mwambule mu dyâpà ncinyi?”

Yèyè ne: “M’Bible.”

Yèyè ne: “Kutu wêwè witabuuja abi to, s’mmwômò’s?” Ki yèyè. . .

Yèyè ne: “Eyowa’s, s’ndi mbiitabuuja, mukalenge.”

133 Yèyè ne: “Utu witabuuja bwalu budibo bàlondamù bwa ne mushipa wa bàlènà wakamina Yona abu anyi?”

Yèyè ne: “Mona’s, cya bushùwà, ndi ngiitabuuja Dìyì dyònsò dîdimu.”

134 Yèyè ne: “Neujaadikeku bwalu abu munyi paa kuumusha ku diitabuuja, cinudi nubiikila ne ndiitabuuja aci?”

“Mona’s,” yèyè ne, “pângààyà mu Dyulu, nênkongkè Yona.” Nwamonu anyi?

Yèyè ne: “Kadi bu yèyè kayimu?”

135 Yèyè ne: “Dîbà adi’s nebikengele umukonke wêwè.” Nenku ngeela meeji ne ki mumwolodi mwîmpè menemene nyèyè awu. Nenku ngeela meeji ne aci’s ncyenzeku bu cya bushùwà.

136 Bu ne Bible uvwa mwambe ne Yone wakamina mushipa wa bàlènà, mémè ndi mufwanyine kuciitabuuja. Yèyè’s uvwa mufwanyine kuwulongolola. Cìdi Nzambi mwambe, Nzambi udi ne bukole bwa kucyenza, ne Yèyè utu misangu yònsò anu ushaala mukwate ku Dìyì Dyende. Pa nanku, Yona, twètù tutu tumuseka. . .

137 Kadi nukaadiku bamone anyi? Padi mushipa wowela, wutu wenda ukebangana ne cyakudya. Nenku padiwu wumana kudya,

wudi wupweka too ne panshi paa mâyi wukiikishisha tupèpà twawu atu panshi paa mâyi apu. Diisha mishipa yebe ya màbundu ayi kadi umone cidi cyènzekà. Yidi yuja anu tuumafu twayi tukese atu, pashiishe yipweka too ne panshi paa mâyi kadi kuteeka tupèpà twayi atu panshi, yishaala milaale mitwe tuumafu panshi ne yishaala mituuje.

¹³⁸ Ee, mushipa munene mulongolola ewu wakalwa kadi kumina muprofeta ewu. Nenku kupwekawu too ne panshi paa mâyi a mbû, pàmwâpa mu ndondo wa mètres makumi mwandamutekete ne abidi mwinshi amu. Wâkapweka mwinshi mule, bwa kwikishawu panshi paa mâyi a mbû apu.

¹³⁹ Mpindyewu twètù misangu yònsò tutu anu twelangana meeji bwa Yona. Nenku muntu yònsò utu wambaku ne: “Mpindyewu bavwa bansambidile, kadi cyana cyanyi kacyna anu cishintuluke to. Bavwa bansambidile, kadi ncyèna ntamba anu kudyumvwa bîmpè to.” Kwikadikù wambila Yona to.

¹⁴⁰ Mpindyewu tangilaayi bileeji bya dîsamà bivwaye yèyè naabi. Mpindyewu, cyakumpala, yèyè uvwa usanganyiibwa munkaci mwa mbû mutuuta kudi cipeepele cikole, kabidi uvwa mupambuke mu njila mwine uvwa Nzambi mumutume. Byanza byende ne makàsà bivwa biswika. Bavwa bamwele mu mbû mutuuta kudi cipeepele cikole, mbû mutomboke, ki mushipa wa bàlenà e kumuminawu kadi kupweka nende too ne panshi paa mâyi a mbû. Nenku yèyè uvwa mulaale muntwamu mu bilushi bya munda abi, mu difu dya mushipa wa bàlenà amu, bisoosa bya mu mbû bimujingile mu nshingu. Nenku bu yèyè mwa kutuma mèsù *elu* luseke, civwa anu difu dya mushipa. Utùma mèsù *lwalwa* luseke, civwa anu difu dya mushipa. Kwònsò kuvwaye mwa kutuma mèsù aku, civwa anu difu dya mushipa. Nwènù badi baakula nwamba bwa bileeji bya dîsaamà, yèyè's nguvwa mufwanyine kwikala mubipete. Kadi nudi bamanye cyakambaye anyi? Wâkamba ne: “Mbintu bya cyanaana bya mafi. Mèmè ncyakubitangilaku kabidi to, kadi nèntangijè cyakabidi mèsù aanyi ku ntempelu Webe wa cijila.”

¹⁴¹ Bwalu Solomo, muntu wetu wa mubidi wa pa buloba ewu, wa bwena wâkasambila dîbà dya dibanjija dya ntempelu awu, wakamba ne: “Mukalenge, bu cisamba Cyebe mwa kusanganyiibwa mu lutatu nansha bamba ne ndwa penyi, bôbò batangije anu mèsù abo ku mwaba wa cijila ewu, dîbà adi wateelejaku mu Dyulu amu.”

¹⁴² Nenku Yona uvwa ne diitabuuja mu bivwa Solomo mwambe mu disambila abi. Ki Nzambi kumusungila kudi mushipa wa bàlenà awu, paanyima paa matuku asatu a muunya ne a bufuku. Yèyè uvwa mufwanyine kwikala muteeke ntenta wa mbombone lwà mwine mwinshi amu. Ncyèna mumanye cyakenza Ye to, kadi Wâkamulama ne mwoyi munda mwa matuku asatu a muunya ne a bufuku, bilondeshile Dîyi. Ne Dîyi ndya cya bushùwà.

143 Ee, piikalabi ne Yona, mwikale mu maalu a mushindu awu avwa mamwenzekele, uvwa mwa kutangija cyakabidi mèsù ende ku ntempelu uvwa muntu mwenze, nebitambe kwikala munyi bwebe wèwè ne mèmè, diloolo edi, bwa kutangija mèsù etu ku Ntempelu udi Yesu usanganyiibwa mwimane ku dyabalume dya Mutambe bunene, ne Mashi Ende Yèyè mwine, utwakwila mwimanyine pa dijikula dyetu, pa tuuleeji twetu tukese twa mäsàamà! Kwikadi upiisha Yona, kadi pashiishe kutangija mèsù ku bidi bikutacisha abi to. Tangija mèsù ebe ku mulayi ne: “Nzambi ngudi mwambe nanku!” Panwikala bânà baa Abraham: “Nzambi ngudi mwambe nanku!” Yèyè ngudi mwenze mulayi, nenku aci ncikose bwalu.

144 Monaayi, bantu bônso bavwa bapatuke baye ku diloba, biikàle bakoka makondo abu ne bikwabo. Paanyima paa muntanci, ki nzambi wa mâyi a mbû udi ubànda ewu, mushipa wa bälènà awu, muvukute lubilu mutangile ku mwelelu wa mâyi. Bantu bônso kupona panshi e kutwa binù. Nzambi’s mmumanye mwa kwenza maalu. Nenku kuyawu too ne ku mwelelu wa mâyi kadi kupatula ludimi e kubanga kudilaka, nenku, dya anu wenza nanku anyi, ki muprofeta udi upatuka mukana mwa mushipa wa bälènà ewu. Muprofeta! Ki nzambi awu kulùkila muprofeta anu ku mwelelu wa mâyi aku. Kabyena bikemesha to paakanyingalalabo. Nwamonu anyi?

145 Aci’s civwa ncimanyinu. Yona mulùka kudi mushipa wa bälènà, s’civwa ncimanyinu. Cyàkenzàye ncinyi? Aci’s civwa ncimanyinu cya kudi Nzambi. Dîyi dyakamba cinyi? “Nyingalalaayi bwa cyanana nudi nubutuka, mu matuku makumi anaayi emu.” Cimanyinu cya Nzambi; Dîyi dya Nzambi! Misangu yônso, padi Nzambi utuma cimanyinu, Nzambi udi utuma Dîyi Dyende dilonda cimanyinu aci. Monaayi: “Nyingalalaayi, bwa cyanana mu matuku makumi anaayi emu cimenga eci cijima necibutuke.”

146 Yone muprofeta udi umweneka pa buloba, paanyima paa bidimu nkama yinaayi byà kabayi ne muprofeta to; cimanyinu cya yèyè umweneka, paanyima paa bidimu nkama yinaayi. Cipoolo cikese cya diikisha aci!

147 Mpindyewu nwènù biikàle baa nyuma nenubakule cîndi ngamba eci. Nzambi akanguleku cyumvwilu cyenu. Kukaadi kupite ntanta bule kaayi?

148 Bidimu nkama yinaayi, Izaleela kayi ne muprofeta to, ekeleeziya yikaavwa midijingakaje, kadi pashiishe ki Yone udi umata mu cyalu ewu. Yone uvwa muprofeta, cimanyinu cya ne Maasiya uvwa ulwa kwakula paanyima pende yèyè. Tangilaayi. Bwalu, Maalaki 3 uvwa mwambe ne: “Nëntumè musanjeela Wanyi kumpala Kwanyi, bwa kulongolola njila, kulongolola cisamba.”

149 Tangilaayi Yone, kakuyi citù nansha cikese mu yêyè to. Yêyè kaakadyangacilaku butumbi to. Baakateeta kumubiikila ne m'Maasiya; kadi yêyè wakamba ne: “Mèmè ncyêna mukumbanyine kusuulula nshinga ya ku bisabaata Byende to.”

150 Kadi Yesu mmwenze anu umweneka, Yêyè uvwa ne cimanyinu, Dikunji dya Kapyra, Bukênkè kumutu Kwende, mu mmwenekelu wa nyuunyi wa nkuci upweka Dìyì dyamba ne: “Ewu ki Mwan'Aanyi munanga, Udi uNsankisha bîmpè.”

151 Monaayi, ki Yone dyakamwe kwambaye ne: “Yêyè udi ne cya kubànda. Mèmè ndi ne cya kupweka.” Yêyè wakaleeja Ekeleeziya kudi Kilisto. Amen.

152 Tutu bayiile ne, mu matuku a ndekeelu, aci necyenzeke cyakabidi! Nekupatuke Mukenji, wikalà mwa kuleeja Maasiya kudi bantu. Nenku neciikale mu mushindu wa ne, nebashaale matama bu byàtà anu mwakashaalabo musangu awu amu. Yêyè ngudi mucilaye. Nshapita wa Maataayi udi ulonda, wa Maalaki, ngudi utwambila bwalu abu. Tangilaayi.

153 Baakeela lukonko pa bwalu abu. Ngiikadilu wa Yone nguvwa umufwanyikija ne nyuma wa Eliya. Mpindyewu tangilaayi baprofeta babidi aba.

154 Mpindyewu, Eliya uvwa mmuntu wàkajuuka mu cikondo cya Izaleela, mu cimvundu cinene.

155 Aakaba nguvwa mfumu. Ne bakaji bônso bakaavwa batentule Izabela, ne pàmwápa ne nsuki mikosa bisuba ne bikwabo byônso, pàmwápa anu mutudi naabi leelu ewu emu. Nenku bônso bakaavwa balonde anu Izabela. Ne bampaasata bavwa beela meeji ne bivwa anu bîmpè. “Balekelaayi. Balekelaayi bàbyènzè.”

156 Nenku mu cikondo aci, Nzambi wakajuula muntu umukila mu cipeela, dîna dyende Eliya. Katwena nansha bamanye kuvwaye mufumine to. Kavwaku ne cilongelu ciine bwa kumujaadikilaku to. Kadi yêyè wakajuuka, ne wakapiisha bintu byônso abi. Wàkapiisha ndongolwelu yônso nkòòng.

157 Bu yêyè mwa kumata mu cyalu, leelu wa Ndaaya ewu, uvwa mwa kupiisha ne wetu ndongolwelu pende.

158 Wàkapiisha Izabela yônso. Nenku, ndekeelu wa byônso, yêyè mukaji awu ngwàkacibwila muprofeta awu panshi. Kunyeemaye e kuya, bu Yone; kudyadijaye mwinshi mwa kaci kaa mupenga pavwa Izabela ukeba bwa kumushebeya. Mukaji ewu uvwa mumukine.

159 Ne pashiishe tudi tujandula ne pààkalwà Yone, upatukila kabidi anu mu cipeela, munangi wa cipeela, mwikàle ne mukenji wa buludi mutangija bakaji bavwa mu nsòmbelu wa bashipe mabaka balwe kubasela, ne kubaselulula, ukosa cintu aci bitupa bitupa. Kavwa mupatukileku mu cilongelu kampanda nansha. Uvwa mufumine yêyè kudi Nzambi, muntu mutuma kudi

Nzambi. Ûvwa upiisha bakaji baa cyena leelu, ubengangana naabo kashendende, kayi mwa kudyanganaku mukana to. Kadi ùvwa wamba anu patooke ne dîbà dikaavwa pabwîpi, Maasiya ukaavwa pa kwakula. Tangilaayi aci.

¹⁶⁰ Mpindyewu fwanyikijaayaaku cikondo cya dilwa dya kumpala dya Eliya ne dya bamwe baa ku baprofeta baa leelu ewu aba, balekela baabo ba-Izabela bakosa nsuki, bavwala tuputulu, banwa mfwanka, cyônsò cidibo baswe kwenza aci, babalombola eku ne eku. Kādîdingikù wàmba cintu nansha cimwe to, cyanana mukaji awu neamushiye, akapete mukwabo. Babalombola eku ne eku ne twitabaayi myenza kudi bantu; aci's mbundu's, malongesha a bantu. Nenku, mu kwenza kwa nanku, badi bavwija mikenji ya Nzambi kayiciyi ne bwenzeji to, bwalu badi mwa kukashaala beena ekeleeziya kadi kutungunuka anu ne kudyamba mùdîbo beena Kilisto, ne kulama makenji abo ne kwamba mudibo beena Kilisto, ne kutungunuka anu ne kuya. Ki cidibo bakeba. Ki civwabo benza cikondo aci.

¹⁶¹ Kadi, vulukaayi ne, mpa dîbà bu dya mushindu awu, bu mwakalaya Nzambi mu Maalaki 4 ne, Yèyè neùjè cyakabidi Diyì. Aci ncyà bushùwà. Tangilaayi mwaba utudi leelu ewu, anu muvwabi menemene mu cikondo cya Yone, anu muvwabi menemene mu bikondo bikwabo.

¹⁶² Anji tangilaayi mwakajuuka ka-Amosa kaa kale aka, kalumyana kakulakaji. Katwena bamanye kwakafuminaku to. Ûvwa mulami wa bimuna. Nzambi uvwa umupatula mu mpàtà ya didiishila mikooko ne mpàtà ya didiishila ngombe, nenku, mwikàle umulongesha. Kadi paakafikaye ku Samaaleya, ne pààkabàndàye e kuyaye kazangama pa kakuna aku dituku adi, kutumaye mèsù lwà kwinshi aku. Ne dîbà adi ditwa nsepe pa mutu wende wa dibàla awu, ne myedi mimane kukunzubila, ne mèsù ende matwangane ne miikale abalakana. Mèsù ende a muntu wa difwana dya Nzambi awu avwa apodya lubilulubilu, kabiyi bwa bintu bivwa beena lwendu lwa dibandila dya myaba bamona pavwabo babwelamu apu to, mbwalu cimenga cijima civwa cidifile anu ku mpekaatu.

¹⁶³ Aka kaamuntu kaa katupa, kadi kakayi kamanyike aka nkanganyi? Eyowa's, s'ng'Amosa, muprofeta. Wàkamba ciprofeta mu cikondo cya Yelobama Mwibîdî, mfumu uvwa mutwe cimpinga awu, wàkalekela bantu benza nî ncinyi cyônsò awu. Baakwidi bavwa bônsò badibwinkemu biikàle babiswe. Baakiibaka ekeleeziya ya mitambe bulenga. Bavwa ne mvwadilu wa kapelu. Bakaji baabo bavwa ne nsômbelu wa masandi. Bavwa bavwala mushindu wônsò naka uvwabo baswe. Beena lwendu lwa dibandila dya myaba bavwa badikungwija myaba yônsò, bwa kubandila bânà baa bakaji balenga kwîsù ne mushindu uvwabo benza maalu a lukutukutu awu.

164 Anu mukwabo États-Unis wa cyena leelu menemene, utudi twamba ne ki cisamba cya Nzambi ewu. Muntu nansha umwe kayiku wamba cintu pa bwalu abu to. Mbyenze anu bu bukole kampanda bukuate bantu's. Makumi ataan- . . .

165 Mbidimu dikumi ne mwandamukulu mpindyewu, leelu ewu! Rebekah wanyi mmukumbaje bidimu dikumi ne mwandamukulu, leelu ewu. Bidimu dikumi ne mwandamukulu, bindi nkosolola ditunga edi, mwikàle mpiisha bintu ebi. Kadi pândi ngaalukila, ku cidimu ne ku cidimu, kudi bakaji badi bakose nsuki yabo bûngi bupite buvwaku pângààkabangà musangu wa kumpala.

166 Muiishi munene, mwende luumu wa beena Mpenta wakangangata e kubwelaye naanyi mu cibambalu kampanda, kukaadi bu cidimu cijima nanku, muntu mwîmpè maalu's, mumanya bîmpè, mumanyike buloba bujima. Wamba ne mêmè. . . "Mwaneetu Branham, itabaku nkutenteketele byanza bwa nkusambidile."

Mêmè ne: "Ncyêna nsaama to."

167 Yèyè ne: "Kadi kudi cintu cidi kacyi bîmpè to." Yèyè ne: "Mwaneetu Branham, wèwè's neunyangakaje mudimu webe wa bwambi. Muntu nansha umwe kaakukwacishangaku neebe mu mudimu to. Kabyena bikemesha to mudi bayiishi kabayi bakwacishangana neebe mu mudimu to; mbwa mushindu wûdi wèwè upiisha bakaji abu." Yèyè ne: "Bantu abu's badi bakubiikila muprofeta."

Mêmè ne: "Kacya nцитuku mwambe ne ki cîndi to."

168 Yèyè ne: "Kadi's badi beela meeji ne ki cyûdi." Yèyè ne: "Mêmè ntu mwitabuuje cintu cimwecimwe aci." Yèyè ne: "Wèwè utu mubiikidiibwe mbwa kusambidila babeedi." Yèyè ne: "Wèwè sambidila anu babeedi, kadi lekela bakaji abu cyanaana. S'udi ubatapa ku mwoyi."

Mêmè ne: "Bishi?"

169 Yèyè ne: "Paudi wamba mudibo ne nsuki mikosa ne bikwabo."

Mêmè ne: "S'mbibi."

170 Bible mmwambe ne: "Mukaji udi—udi ukosa nsuki yende, bayende udi ne bukenji bwa kumwipata kushipa dibaka." Cya bushùwà menemene. "Udi ufwishu mutu wende bundu." Ki cidi Bible mwambe. Mpindyewu ncyêna mumanye ní nudi baswe aci anyi to, kadi ncidi Bible mwambe, mu Kolinto wa Kumpala.

171 [Katupa kaa mukaba wa mêyi munda mutupu—Muf.] . . . cyonye dikoba ndendende mu mushindu wa dikoba dishaale dimweneke ne pambelu. Ki pasiishe ùlwa—ùlwa apu, kadi kwamba ne: "Mona's Mukalenge Branham, s'ki mushindu wònsò wa bilàmbà bidibo basumbisha."

172 S'bacitu anu basumbisha bilàmbà bya mpeesa ne mashinyi a bilàmbà. Kakwenaku kabingila nansha kamwe to. Bakaji baa ba-Amish ne baa ba-Dunkard s'bacitu anu babivwala. Cya bushùwà. [Disangisha didi dituuta bikashi—Muf.]

Neuku cidi cyenzeka ncinyi? Badi bapatuka pambelu pààpa benza maalu a macimbu.

173 Mukaji mukwabo wakamba ne: “Ee, Mukalenge Branham, mèmè nciitu mvwala tuputulu to. Ntu mvwala tup-...” Bitu mbinganyi biine abi, kapanu kashiikile mu mabund-... [Mwaneetu wa balume mukwabo udi wamba ne: “Kapanu kashiikile mu mabunda.”—Muf.] Eyowa. Yèyè ne: “Ki tùntù mèmè mvwala.”

174 Mèmè ne: “Aci's ki cidi citambe ubi.” Mèmè ne: “Bible udi wamba ne: ‘Ncinyangu bwa muntu mukaji uvwala civwalu cidi cikumbanyina muntu mulume.’” Ne mushindu mwine wa mmwenekelu mukooyike udi nende États-Unis ewu patudi twakulangana apa's we! Nwamonu anyi? Ncya bushùwà's.

175 Lekela nkwambileku cintu kampana, wèwè mwaneetu wa bakaji. Udi mufwanyine kwikala mukezuke anu mudi cilòngò cya mbata amu, kumpala kwa bayeebe anyi kwa mubangila webe, kadi mu Dituku dya Cilumbulwidi neulumbulule bwa ne wàkenda masandi. Yesu wakamba ne: “Ewu yònsò ukatangidi mukaji, bwa kumwalakana, wamanyi kwenda nende masandi.” Ngènzàmpèkààtù awu mukutangile, nenku mukaji awu ngwìkala ne cya kulumbulula mu Dituku dya Cilumbulwidi. Wèwè ngudi mudizanjike kudiye. Enza mùdì muswe amu. Uh-huh.

176 Mukaji wa difwana dya Nzambi mmufwanjine kujinga kuvwala mushindu awu bwa cinyi? Pashiishe wèwè kubanga kulaka mukana mùdì ne Nyuma Mwimpè ne bwalu nyawu utu mwakule mu myakulu ne munyeemakane wabànda wàpweka panshi apa. Aci, nansha nanku, mèmè's nkaadi mumonemone bampangaanu benza cyòci aci, ba-Hottentots. Nyuma Mwimpè mbukezuke, wa cijila, ne kayi mukooyike to. Cya bushùwà.

177 Muntu awu kwambaye ne: “Pawikala . . . Batu biitabuuja ne wèwè udi muprofeta. Mbwa cinyi kuyiku ubalongesha mushindu wa bôbò kupeta mapà manene a Nyuma, ne wa kwenzabo bintu bwa Nzambi? Bwa cinyi kuyiku ubalongesha byôbi abi pawikala muprofeta?”

178 Mèmè kwamba ne: “Mmunyi mùndì mwa kubalongesha makumi makole padibo kabayi nansha baswe kuyiila ABC?” Nudi bamanye cidi ABC wumvwija anyi? “Always Believe Christ.” [“Kwitabuuja Kilisto Misangu yònsò.”—Muk.] Uh-huh. Mmunyi muwenzà ciine aci? Nwamonu's, udi muswe kubànda kuulu *kwaka*, pamutu paa kubangila kwini *eku*.

179 Nzambi mmuswe kwibakila Ekeleeziya Wende pa bishimikidi bya Yesu Kilisto, ne byôbi abi ki Bible. Bwa pa

kuumusha aci, myaba mikwabo yônso ndunteka. Nzambi katu ushintuluka to. Ngiikadilu Wende katu ushintuluka to.

¹⁸⁰ Yêyè mmwenze bantu bakaji bashiilangane ne bantu balume, ne bantu balume bashiilangane ne bantu bakaji. Mmubavwadike bishiilangane, ne mmuswe bwa kushaalabo mushindu awu. Nwamonu anyi? Bakaji mbajinge kumweka bu balume, ne balume mbajinge kumweka bu bakaji. Kaa, ekelekele! Dinyangakaja dya maalu dya dikema! Cidi. . . Ne cintu cyônso mu kaabujima, bidi bimweka anu bu bukole kampana bukuate bantu, kakuyiku mushindu wa kubishintulula to. Bimweka bu cilengulengu cinene, mufitu munene; bu nwênù mwa kuumvwa bìndì ngamba ebi, mu nyuma. Cilengulengu kampana ncikaadi cimane kubapya nzadi, ne bôbò kabayiku—kabayiku ne mushindu wa kutuukaku to; Hollywood búngì cyanaana, télévision búngì cyanaana, lukutukutu lukwabo búngì cyanaana. Bitudi naabi byônso bikaadi bikooyike. Kakuyi mpatà ne: “Mudimu wôwò kawuyi mwipidija to, bwa Basungula, kakwakwikala musunya wasungidiibwa nansha umwe.”

¹⁸¹ Wêwè wambi ne: “Kacyakacya ncivwa mumanyeku aci kwônso eku to.” Ee, bwa mpindyewu wacimanyi, kubangila ku mpindyewu. Nwamonu anyi? Aci cidi. . . Mbîmpè ngiimanyike bwalu abu. Twalukilaayi paanyima. Monaayi.

¹⁸² Yone uvwa ncimanyinu. Kabidi nwavulukaayi ne, mushindu wàkacyènzà Nzambi musangu wa kumpala awu, mushindu awu ngwàcyènzàYe kabidi. Yêyè ngwàkalaya bwa kucyenza. Mpindyewu, kacyakacya Nzambi katuku mwanji kukwata mudimu ne musumbà wa bantu to, musangu nansha umwe, bwa cintu bu nanku.

¹⁸³ Vulukaayi ne, kuvwa musumbà musangu kampana, uvwa ne, muntu munene dînà dyende Aakaba, wakadipetela. . . wakadipetela baprofeta nkama yinaayi baa beena Izaleela. Mpindyewu, bôbò abu kabavwa baprofeta baa bampangaanu to. Baprofeta nkama yinaayi baa beena Izaleela. Bônso bavwa muntu ne muntu ne dipolome ne bikwabo byônso, biikàle ne cilongelu cinene.

¹⁸⁴ Kuvwa muntu kampana wa difwana dya Nzambi dînà dyende Yehoshafata, uvwa mfumu wa Yuda, ki kupweka e kulwaye. Mwaba ùvwà mwena kwitabuuja mukadibwejakaje ne mwena bupidya ngwôwù awu. Maalu kadi kunyangukawu.

¹⁸⁵ Ki kwambaye ne: “Laamota-Gilada. . .” Mpindyewu tangilaayi eci, mushindu udici mwa kwikala cilelela. Yêyè ne: “Laamota-Gilada ngwetu twêtù, mwaba wawa. Lwà mu citupa cya buloba cyacya naka, ncyetu twêtù.” Yoshuwa, mu kwabanya kwa malaba, wakamupeesha Izaleela. Kadi beena Peleshete, bampangaanu abu, kulwa e kubanyengayi. Yêyè ne: “Ngwetu twêtù.”

186 Mpindyewu tangilaayi, bilondeshile maalu mudiwu menemene, mùdì bantu mwa kwikala babinge kadi nansha nanku kadi kuCipangila. Cintu aci mu bushùwà bwa bwalu civwa ncyà Izaleela. Kadi milayi ya Nzambi yònsò, mwaneetu, yitu anu ku mishingà, nwamonu's: "Piikalabi ne badi benda kumpala kwa Mukalenge."

187 Mpindyewu tangilaayi kuneeku. Yèyè kwamba ne: "Udi muswe kuya naanyi, kunkwacisha bwa mèmè kwangatulula buloba abu anyi? Ee, mbwena kwamba ne, bânà baa beena Peleshete baba badi buuja mafu muntu mwamwa, ne blé wa Izaleela." Aci mmwômò bilondeshile Mifundu. Yèyè kwamba ne: "Unkwacishe bwa kuyaku ne kubakwata."

188 Awu ne: "Ee, baanyi. . ." Mwaba awu ki wakenzelaye cilema cya yèyè kayi mwele meeji to ne: "Makalu aanyi a mvita's ngeebe wèwè, bantu baanyi's mbamwe ne beebe. Nènye neebe."

189 Kadi pashiishe Yehoshafata kubangaye kwela meeji, nudi bamanye's. "Amba tûng, kabyenaku bikengela twètù kwanji kukonka Mukalenge kumpala kwa kuya anyi?"

190 "Kaa, mu bushùwà bwa bwalu," mwakamba Aakaba, "cya bushùwà's. Uh-huh. Umfwileku luse. S'bivwa bikengela mèmè—mèmè kwikala mutumeku meeji ku bwine bwalu abu's."

"Kakwenaku muprofeta mwaba kampanda anyi?"

191 "Kaa, bushùwà's. S'ndi ne—ndi naabo se—seminere mujima mwaba ewu, balenga baa kacya baudi kuyiku mwanji kumona to. Bònsò mbavwale bilàmbà bilenga bya kapelu. Bòbò mbamanyi baa mabàla baa batambe kutumbuka. Mèmè ngudi mubalongeshishe, dilongesha dya kalàndààmùsèngà. Netuye kabangata."

192 Ki kupwekabo kuntwaku. Ki bònsò kudisangishabo pamwe. Kabavwa ne bya lubombo nansha. Bòbò kusambila kusambila kusambila, too ne mwakamonabo cikeena-kumona.

193 Ki pashiishe kubandabo. Nenu umwe wabo ukaavwa mudyènzèle nsengu minene yibidi ya cyamu cifiike. Yèyè ne: "Ku yôyi eyi nkuwikala mwa kusukuma beena Peleshete, anyi beena—beena Ashu, too ne pambelu paa ditunga." Yèyè ne: "EMU MMUDI MUKALENGE WAMBA. Ndaaku, Mukalenge udi neebe." Umwe ne umwe wa kudibo, dîbà adi, ne dîyì dimwe, kutuukabo nyuma. Baprofeta baa beena Izaleele abu kwambabo ne: "Ndaaku, Mukalenge udi neebe." (Udi wamba ne: "Aci ncyà mu Mifundu anyi?") "Nzambi ngudi mupeeshe cisamba bumpyanyi ebu, kadi mwena lukuna ukaadi yèyè naabu. Wèwè udi ne bukenji bwa kuya kabwangata."

Mpindyewu, Mpenta, ndi muswe nuyiile dileesona kaaba aka.

¹⁹⁴ Kadi, Yehoshafata, bu muvwaye muntu wa difwana dya Nzambi, kwambaye ne: “Kucidi anu kaacintu kapampalamuke ndambu.” Yêyè ne: “Kwenàku ne mukwabo anyi?”

¹⁹⁵ “Mukwabo kabidi, paanyima paa baprofeta nkama yinaayi balongesha bîmpè biimane mwaba ewu?” Bûngì anu bu bwa badi mu nzubu wa panshi ewu aba. “Biimane ne dîyì dimwe, bamba ne: ‘EMU MMUDI MUKALENGE WAMBA.’ Kucipindulula, kadi kwamba ne: ‘Yoshuwa ngwâkatùpa buloba abu. Mbwetu twètù. Ndaaku ùbwängàtè!’”

¹⁹⁶ Kadi Yehoshafata yêyè wakalomba mukwabo. Yêyè ne: “Kakwenaku mukwabo kutudi mwa kukonkela Mukalenge anyi?”

¹⁹⁷ Yêyè ne: “Kaa, kudi mukwabo, kadi,” ki yêyè, “mêmè ntu mumukine.” Uh-huh, uh-huh. Yêyè ne: “M’Miika, mwânà wa Imla.” Yêyè ne: “Ntu mumukine. Yêyè utu misangu yende yònsò anu wamba bintu bibi bwanyi mêmè.”

Yêyè kwamba ne: “Mfumu kaakuluku nanku awu to. Bakamwangate.”

¹⁹⁸ Ki kutumabo bantu kampanda ne mukenji kuntwaku. Ki umwe wa kudibo kwambaye ne: “Mpindyewu, Miika, ndi njinga nkwambileku bwalu. Mpindyewu, s’udi mumanye ne mbakwipate mu bwobumwe, . . . -kwipate mu dyumvwangana, anu abidi adi panshi aa, bwalu wêwè utu anu wamba bintu bibi bwa bantu. Bwa mpindyewu pawaswa kupetulula karta keebe kaa bu mambala, wâmbè cintu cimwecimwe cidibo bamba bôbò aci, nenku, kaa, bôbò’s nebakwele mu diboko ne lukasa lwônsò.”

¹⁹⁹ Kadi kwenzekabi ne yêyè uwva muprofeta anu wa bulelela ewu. Yêyè kwamba ne: “Bu mudi Mukalenge Nzambi ne mwoyi, mêmè nêngâmbè anu cyateeka Mukalenge mukana mwanyi aci.” Kaa! Nzambi abeneshe muntu awu. Yêyè ne: “Indilaayi too ne bufuku ebu, nenku nêmmônè cyangambila Mukalenge aci.”

²⁰⁰ Paakacyabu mu dinda, yêyè kwamba ne: “Ndaaku, kadi ndi mumone Izaleela mutangalake byenze bu mudi mikooko kayiyi ne mulami to.” Pashiishe kwangataye cikeena-kumona cyende e kucifwanyikijaye ne civwa Eliya mwambe, civwa cyenzekele Aakaba. Mmunyi muvwaYe mwa kubenesha cikaavwabo beele mulawu? Nansha byôbi ne . . .

²⁰¹ Twètù’s tudi ditunga didi ne difwana dya Nzambi. Ekeleeziya wa beena Mpenta, ba-Baptistes, ne ba-Méthodistes, ne bikwabo, ng’ekeleeziya wa beena Kilisto, kadi mmunyi munudi mwa kubenesha cikaadi Nzambi mwele mulawu? “Kakwena bwalu to,” mûdì wamba, “mêmè—mêmè nkaadi mukashaale mwena *cikampanda*. Ndi mwenze *cikansanga*.” Aci kacyna cipetangana ne cyôci aci to. Tangila cinudi benze. Tangila Mpenta, mukaadibo balekelele biibi bwashi. Tangila cinuvwa kumpàla, kadi tangila cinudi mpindyewu. Kabiya bikemeshaku to, mèsù adi, mèsù mmafofomija.

202 Pashiishe yêyè, Aakaba, anyi...Mwakwidi ewu kadi kumutapaye dipi ku mishiku. Ki yêyè ne: “Mwelaayi,” Aakaba ngwâkamba awu, “mwelaayi mwamwa mu kazùbù kaa munda kaa buloko amu. Pângààlukilà mu ditalala, nêntangilè bwalu bwa mulumyana awu.”

203 Yêyè ne: “Wêwè anu mwalukile, Nzambi kî mmwakule naanyi to.” Uh-huh? Nwamonu anyi? Ki muprofeta nyêyè awu, ki cimanyinu ncyôci aci; ki Dîyì Dyende ndyôdi adi. Nenku, kupanga kuDitumikila kuvwa kutwala dilumbulwisha.

204 Nyuma Mwîmpè ngudi wetu muprofeta leelu ewu. Kupanga kuteeleja Dîyì Dyende? Mmumanyishiibwe mu Mifundu, bwa ne Yêyè nguwu mwa kwamba bintu ebi. Yesu Kilisto, mu mmwenekelu wa Nyuma Mwîmpè!

205 Nzambi uvwa ukwata mudimu ne muntu umwepele ewu. Eci, Nzambi katu ukwataku mudimu ne bisumbu to; nne muntu umwepele. Eliya kavwa cisumbu to. Yone kavwa cisumbu to. Kabavwa cisumbu anyi dingumba to, nansha umwe wa kudibo. Kadi bubidi bwabo baakapiisha bya nanku. Ncyà bushùwà. Yone wakamba ne: “Kanwedi meeji bwa kwamba ne tudi ne Abraham bu taatù wetu to. Nzambi udi ne bukole bwa ku mabwe aa kajuudila Abraham bânà.”

206 Nenku cimanyinu cya cikondo cya kunshiikidilu neciikale ne Dîyì dya cikondo cya kunshiikidilu. Ne cimanyinu cya cikondo cya kunshiikidilu neciikale bilondeshile cidi cidyànjila kwamba mu Bible. Ne Dîyì dya cikondo cya kunshiikidilu adi, didi dilonda cimanyinu cya cikondo cya kunshiikidilu, neciikale cimanyishiibwe anu menemene mu Mifundu, nediikale Mufundu utu mulayiibwe.

207 Mpindyewu twâbadi mu Luuka 17 ne cimanyinu cya cikondo cya kunshiikidilu neciikale cinyi, neciikale mwakadici mu Sodoma amu, mulayi. Nenku tudi ne Sodoma mu mubidi, bwa cinyi katuyiku mwa kwitabuuja cimanyinu mu nyuma mwaba ewu? Bu nwênukù mwa kumona Mifundu, kabidi, Luka 17's ncimanyinu, kadi Maalaki 4 ki Dîyì. Cimanyinu civwa bu Nzambi mumwêneshiibwe mu mubidi, umanya maalu masokome a mu mwoyi; ne Dîyì dya Maalaki 4 divwa nkukudimuna bantu kubuumusha ku twitabaayi yabo, kubaaluja ku Diitabuuja dya baataatù. Ki cimanyinu ncyôci aci.

208 Nudi bamanye ne bwalu budi bishi? Nkaadi njikija mpindyewu. Bimanyinu bitu anu biitabuujiibwa pa ciibidilu, bushùwà; kadi, bwa Dîyì dyôdi, kaa, to. Dîyì didi dilondà cimanyinu adi, kabeena bwalu ne aci to. Eyowa's.

209 Cimanyinu cya Yesu, bu Maasiya, bwa kwondopa babeedi, aci kaayi baakaciitabuuja. Kadi dîngà dituku Yêyè kwamba ne: “Mêmè ne Taatù tudi umwe.”

210 Kaa, ekelekele, adi Dìyì kabaakadiitaba to. Baakamba ne: “Udi udivwija Wèwè mwine Nzambi, mwikàle mwomumwe ne Nzambi.”

Yèyè wakamba ne: “Mémè ndi Mwânà wa Nzambi.”

211 “Kaa, ekelekele, mmunyi muvwa Nzambi mufwanyine kwikala ne Mwânà?” Nwamonu anyi? “Kabyenaku mwa kwenzeka bwa Nzambi kwikalaye ne Mwânà to!”

212 Kadi, nudi numona’s, baakiitabuuja ci—cimanyinu, babeedi bavwa mwa kwondopiibwa, nenku, kaa, aci civwa cilenga cya dikema, civwa anu cîmpè be. Kadi pakaavwabi ne mbwa Dìyì, kabaakaswa kwitabuuja Dìyì nansha. Baakenza cinyi? BaakaMwela pambelu.

213 Kadi nudi bamanye ne bwalu budi bishi? Bible udi utwambila, mu Bwakabuulwibwa mu nshapita mwi3 ne, mu Cikondo cya Ekeleeziya wa Laodikiya, bavwa mwa kuMwenzu cintu cimwecimwe aci. Ûvwa pambelu paa ekeleeziya. Ki Dìyì dimweneshiibwe ndyôdi adi. Yèyè uvwa Dìyì dimweneshiibwe. Yèyè udici anu Dìyì dimweneshiibwe.

214 Bu nwènù mwa kwitabuuja cimanyinu cya Sodoma, cya Luuka, bu nwènù mwa kwitabuuja cyôci aci, kadi mbwa cinyi kubenga kwitabuuja Dìyì dya Maalaki 4? Nwamonu’s, bwa cinyi kùyi witaba, wèwè? S’cidi mwa kushindikiibwa. Mushindu umwepele udici mwa kwenjiibwa udi. . . Cimanyinu cidi mwa kujaadikiibwa, kadi bidi bikengela bwa wèwè kwitaba Dìyì.

215 Mòsà wakatumiibwa ne mudimu wa kupwekaye, mu mubidi ewu, kuya kangata cimanyinu cya mu nyuma ne kubiikila bantu bwa kwalukilabo ku mulayi wa baataatù.

216 Budi Maalaki 4 naabu mbwa kwaluja bantu “ku Diitabuuja dya baataatù.” Kaa, alukilaayi, Éyi nwènù bampofu ne badi batangalake, kudi baa kwenu!

217 Bwa kujikija, ndi ngamba nunku ewu, dîyì dya ndekeelu edi. Muprofeta wakamba ne: “Nekwikale Bukênkè ku dîbà dya diloolo.” Tangilaayi, wákamba ne: “Nekwikale dituku kadiyi difwanyine kubiikidiibwa ne mmundaamuunya anyi mbufuku to.” Mpindyewu teejeaayaaku. Nkaadi njikija. “Nekwikale dituku. . .” Lekelaayi eci cipweke ne mu ndondo, ne Nzambi anyisheku aciteeke mu mwoyi ne mwoyi wa cisumbu eci, diloolo edi, mu dibalaasa emu. Muprofeta wakamba ne: “Nekwikale dituku kadiyi difwanyine kubiikidiibwa ne mmundaamuunya anyi mbufuku to, dituku dyenze bu dya dibungama nanku awu, dya mvula, dya mafwima. Kadi,” mwakambaye, “ku dîbà dya diloolo, nekwikale Bukênkè.”

218 Mpindyewu, vulukaayi ne, dîbà ditu misangu yònsò dijuukila anu ku Esete diikàle diya ku Wesete. Dishidimuka ndilonde dîbà. Bwa aci nutu bamanye. Nenku, monaayi, dîbà dimwedimwe ditu dijuuka ku Esete adi nditu dikabwela ku

Wesete. Mpindyewu, dishidimuka ndyenze lwendu anu pamwe ne dîbà menemene, mu mushindu wa ne patudi twakulangana apa Esete ne Wesete bikaadi bitwilangane. Tudi ku Côte Ouest; Esete ne Wesete.

²¹⁹ Nenku, vulukaayi ne, Evanjeeliyo mmwenze lwendu anu mushindu umweumwe awu. Mmujuukile ku Esete, dilwa dya Yesu Kilisto, M-w-â-n-à [S-o-n, mu Anglais–Muk.], kî d-î-b-à [s-u-n] to. M-w-â-n-à, Mwânà wa Nzambi, wakajuukila ku Esete, kudi bantu baa ku Esete.

²²⁰ Nenku mpindyewu nkulwe dituku didi bantu bakashaale beena ekeleeziya, benze mangumba, anu ndambu mukumbane wa bukênkè bwa kumona: “Ee, netupete ekeleeziya. Netwibake *cikampanda*. Netwibake cilongelu. Netwibake lupitaadi. Netulongeshangane tulaasa. Netupete seminere.” Mbatete bukênkè bukumbane bwa kwenza biine abi.

²²¹ Kadi, nwavulukaayi ne, Bible mmwambe, muprofeta wa Mukalenge, mu Bible, udi EMU MMUDI MUKALENGE WAMBA awu: “Dîbà dimwedimwe dyàkateemà ku Esete adi ki dyàteemà kabidi ku Wesete, ku dîbà dya diloolo. Nekwikale Bukênkè ku dîbà dya diloolo.”

²²² Ncinyi cyenzaYe? Aci cidid cyenza anu menemene cyakambaYe mu Luuka nshapita wa 17. “Ku cikondo cya kunshiikidilu, piikalà Mwânà wa muntu munkaci mwa kubuuludiibwa mushindu umweumwe wakabuuludiibwaYe ku Esete awu, Mwânà umwèumwè awu mwikàle ukenkesha, Bukole bumwebumwe abu, Nyuma Mwîmpè umwèumwè awu, Cintu cimwecimwe aci ciikàle cyenza cintu cimwecimwe aci. Nekwikale Bukênkè ku dîbà dya diloolo.”

²²³ Dîbà dimwedimwe didi dyenze lwendu adi; M-w-â-n-à umwèumwè awu mmwenze lwendu; mupweke mulwe kupicila ku Esete, kuumukila ku Pôlò; kutupika kubwela mu Allemagne, pa Martin Luther; kutupika kabidi, pa nokokelu Wende wâkalonda awu; ki kuumukilaye aku kuya mu Angleterre, kudi John Wesley; kutupika Mbû wa Atlantique, kuya mu États-Unis, ku Mpenta; kadi patukaadi twakulangana apa Mpenta wâshèèpekeci, nenku tukaadi pa Côte.

²²⁴ Yôsò wa kudibo, ukaadi mudyènzè dingumba, anu mwakenzabo ku cibangidilu amu, benze bulongolodi bùtù Nzambi mwele mulawu. Mpenta, ne bônso abu, mbenze nanku.

²²⁵ Kadi Yèyè wakamba ne: “Nekwikale Bukênkè ku dîbà dya diloolo. Nekujuuke cimanyinu ku dîbà dya diloolo.” KaCinupiciku to, balunda baanyi. KaCinupici to. Mpindyewu, Mwânà umwèumwè awu uvwa mwa kufila Bukênkè bumwebumwe abu. D-î-b-à dimwedimwe adi didi difila bukênkè bumwebumwe bwa d-î-b-à abu. M-w-â-n-à umwèumwè awu udi ufila Bukênkè bumwebumwe bwa M-w-â-n-à abu.

226 Mpindyewu, awu kî mmêyi aanyi mêmè to. Muntu yônsò udi mwaba ewu, udi mumanye ne Bible ngudi mwambe nanku, elaayi byanza muulu. [Disangisha didi dyamba ne: “Amen.”—Muf.] Aci ncyà bushùwà menemene.

227 Mpindyewu, nudi anu mwa kucyenza’s, ncinutangile. Itabuujaayi ne Mwânà wa Nzambi, Yesu Kilisto, udi ne, kî mmufwe to. Yèyè udi ne mwoyi. Ûdi Yèyè mu didipwekesha, mudipwekeshe. Yèyè utu misangu yônsò musòmbèlemù mushindu awu. Njila wa muulu mpanshi. Dipwekeshaayi, shiyanganaayi ne mmwenenu yenu ya myumakane ayi, nwitabuuje Mukalenge Yesu. Monaayi cimanyinu, pashiishe nwitabuuje Dìyi. Alukilaayi, Éyi nwènu badi batangalake, kudi baa kwenu!

Twinyikaayi mitu yetu.

228 “Nenku piikalabo kabayi biitabuuje Dìyi dya cimanyinu cya kumpala, mu cyanza, bu mwakadibi ne Mòsà, dîbà adi wènzè cimanyinu ciibîdî. Pashiishe, piikalabo kabayi biitabuuje eci cimanyinu, dîbà adi wangate mâyi (mâyi adi aleeja mwoyi) adi mu mbû munene anyi mbû mukese, ûàpòngòlòlè panshi, neandamuke mashi.”

229 Taatù wa mu Dyulu, dîbà ndipite bikole mpindyewu, kadi Wèwè ngudi mulaye ne nekwikale Bukênkè ku ibaamulòlòlò. Enzaku bwa Dìyi dya Evanjeeliyo wetu dipweke too ne mu kandondo kaa myoyi ya bantu, padibo beelangana meeji pa Dyôdi ne baDilonga ku Dìyi apa.

230 Beneshaku cisumbu eci, Mukalenge. Beneshaku bantu aba. Mona mudibo basòmbè mwab’ewu, bânà ne nzala, bakwate ne bya luse biikàle babasakila ne babacincimika eku ne eku, ne biine *ebi*, tudi bamanye ne Sataana mmubyènzè anu bwa kubafomija bwa kabamonu cintu aci paafikaCi to. Swaku, diloolo edi, biitabuuje Yesu Kilisto, ne dîyi dimwe, biitabuuje mulayi Wende, ne Yèyè mmubiike ku bafwe.

231 Wèwè wâkamba ne: “Pa dîbà didibo kabayi beelela meeji to, pa dîbà adi ki paalwa Mwânà wa muntu.”

232 Anu padi ekeleeziya mupete, mwikàle ne mfranga yàbûngi, wela mìliyò ya ndola mu diibaka dya bitanda. Bavwa mwa kwikala bîmpè menemene, Taatù, mûndi ngiitabuuja, bu bôbò mwa kwalukila ku cikondo cîvwàbo biimane kuulu mu disangu, bimba kaa—kaadikasa, ne cifulu mu cyanza, ne ngoma mu disangu bu beena Armée du Salut, pamutu paa kwikala basòmbè mu nzubu minene ya bitalu eyi diloolo edi, bateeta bwa kutentula baa pa buloba: “Biikàle ne cimwenekelu cya difwana dya Nzambi, kadi babenga kwitaba Bukole bwadi.”

233 Twènzèlèku, Mukalenge, diloolo edi, bwa musangu ewu kabidi, Mukalenge; mwakeela Shimishoona lubila ne: “Bwa musangu ewu kabidi, Mukalenge, bwa musangu ewu kabidi.” Bimanyiiwbeku ne Wèwè udi Kilisto, Mwânà wa Nzambi;

umwèumwè awu makeelela, leelu, too ne kashidi. Nenku dimanyishaaku Wèwè mwine munkaci mwetu, bwa bamone cimanyinu, pàmwāpa nebiitabuuje Dīyì. Mu eci, ndi ndomba mu Dīnà dya Yesu Kilisto. Amen.

²³⁴ Netwikale mwa kubiikila mulongo wa babeedi, lukasalukasa. Ngāmònu ne dībà ndikumbane anu mpindyewu mene dya twètù kutangalaka. Kadi twéznààyi mulongo wa babeedi, anu mulongo wa babeedi mukese cyanaana, pashiishe netubange maalaba.

²³⁵ Mmwabanye twarta twa disambila leelu ewu. Ki bwa cinyi, tutu twabanya twarta dituku dyònsò, bwa muntu ne muntu apete mpùngà yèyè mulwe cikondo kanà cyònsò. Kujuuka kwimana mu mulongo wa babeedi, aci kī nciidi cikwondopa to. Muntu kana yònsò ewu mmumanye ne, mu disangisha dyònsò, kutu bantu badi bondopiibwa kunudi aku kutamba badi bondopiibwa pa cibumba apa, nwamonu's, misangu yònsò. Nyuma Mwimpè utu anu myaba yònsò. Yèyè udi ukeba anu bwa kupeta beena kwitabuuja, kwajiki, ki kudiYe mwa kufika.

²³⁶ Mbaabanye twarta twa disambila twa P, bu mu Paul. Twéznààyi, mwaba utuvwa...Ee, tubiikile kubangila ku umwe. Umwe, ibidi, isatu, inaayi, itaanu, isambombo, mwandamutekete, mwandamukulu, citeema, dikumi, bàjuukè bìimanyine kuulu lwà apa, bu nwènù mwa kwanyisha. Karta kaabo kaa disambila kaa P, bu mu Paul, umwe too ne ku dikumi, imanyinaayi lwà apa ku elu luseke eku, panwikala ne mushindu wa kujuka. Pawikala kuyi ne mushindu to, dībà adi netwambile muntu bwa kukukwacishaye. Dikumi; umwe, ibidi, isatu, inaayi, itaanu, isambombo, mwandamutekete, mwandamukulu. . . Eyo, tukwabo tubidi. Mwandamukulu, citeema, dikumi, eyo. Dikumi too ne ku dikumi ne itaanu, dikumi too ne ku dikumi ne itaanu, atu ntukwabo tutaanu. Dikumi ne itaanu too ne ku makumi abidi, juukaayi bwa mmone ne nudi mwa kujuka; P, dikumi ne itaanu too ne ku makumi abidi. Makumi abidi too ne ku makumi abidi ne itaanu. Twǎnjààyi kumona mpindyewu, mwaba wònsò wûdi usanganyibwa awu. Mpindyewu bakwabo baa ku bateeleji bìikalè mu kaneemu kaa menemene, bwa ndambu wa tusunsa cyanaana. N'karta kaa disambila kaa P, umwe too ne ku makumi abidi ne itaanu. Kī mmwômò anyi? Makumi abidi ne itaanu, umwe too ne ku makumi abidi ne itaanu.

²³⁷ Mpindyewu bakwabo bònsò biikàle mu kaneemu kaa menemene. Nupe Nzambi kaneemu mushindu awu, nùkàpè Mukenji. Nudi ne cya kukapa Nzambi, kutangila katanci ne kwelangana meeji.

²³⁸ Mpindyewu ndi ngeela meeji ne badi munkaci mwa kufikisha bantu ku didilongolola. Aba badi kabayi. . . Piikalabi ne badi ne karta kaa disambila, bònsò kabayi beele mulongo to, nebaajandule aci; nebangambile mu tusunsa tukese emu, nenku

pashiishe nebiikale mwa...pashiishe netumone pàmwăpa muntu mpudimaci anyi muntu kampanda kayi ne mushindu to.

²³⁹ Ncyêna mumanye ne tûdi penyi to, balunda baanyi, twarta twa disambila atu. Mwanaanyi wa balume udi upweka apa... (Uvwa mutwăbànye nganyi? Ngwêwè, anyi m'Billy? M'Billy?) Nenku yêyè udi upweka apa, ucyompakaja twarta atu, kumpala kwenu, pashiishe ukupeesha karta kaa disambila; upweka buludi, unwambila bônso bwa kusomba, ukupeesha karta kaa disambila. Nwamonu anyi? Mêmè ncyêna mumanye ne twôtò atu tûdi penyi to. Ndi muteete bwa kufikisha mwânâ ewu apa, nwamonu's. Nenku, ne bakwabo, ncyêna—ncyêna mumanye to, ncyêna—ncyêna ne mushindu wa kumanya abi to. Ngeela meeji ne Nzambi ngudi anu ubilongolola mu mushindu udiYe Yêyè muswe kubilongolola awu.

²⁴⁰ Mpindyewu, mpindyewu bakwabo baa kunudi, badi kabayi ne karta kaa disambila abu. Ela cyanza muulu, wamba ne: "Ncyêna ne karta kaa disambila to, kadi ndi nsaama." Ela cyanza muulu, nansha penyi mu citanda emu. Nansha wêwè usanganyiibwa penyi, ela cyanza muulu...Ee, nanku kakwena bantu bapitepi bûngî mwaba ewu to, mpindyewu. Ee, bu mùdîbi nanku, kabyakutwangata ntanta mule menemene mpindyewu bwa kusambidila mulongo wa babeedi maalaba to. Kudi bantu bu makumi abidi munda emu, pa kuumusha badi biimane kuulu mwaba ewu aba, badi basaama.

²⁴¹ Abi's mbîmpè. Ndi ne disanka dya kunumona nuciitaba mushindu awu. Nuvwa ne diitabuuja dyăbûngî kupita mûmvwâ mêmè nnwelela meeji, pàmwăpa. Nwamonu anyi? Nwamonu anyi? Pawikala mwitabe dyondopa dyebe, mwimanshe karta keebe aku, Nzambi akubeneshe. Ki diitabuuja dishuwashuwale ndyôdi adi. Muntu nansha umwe nyawu kayi mukutentekele byanza to; wêwè ngudi mutenteke byanza byebe pa Kilisto.

²⁴² Mpindyewu nwênù badi apa diloolo edi aba, biikalà kanuyi nubwela mu mulongo wa babeedi abu, itabuujaayi bwalu bûndî ndonda ebu. Bu muvwa mukaji wăkalenga luzemba lwa civwalu Cyende, ne Yêyè kukudimuka ne kujingulula ne mukaji awu nguvwa muMulenge, mbanganyi badi bavuluke bwalu abu? Ncya bushûwâ, nudi bavuluke.

²⁴³ Mpindyewu nudi nwitabuuja ne, Yêyè, Bible mmwambe mu Ebelu 4, ne: "Yêyè m'Mwakwidi Munene, mpindyewu mene, udi mwa kuumvwa padi mateketa etu amulenga" anyi? [Disangisha didi dyamba ne: "Amen."—Muf.] Ee, piikalabi ne Yêyè udi umwèumwè awu makeelela, leelu, too ne kashidi, Yêyè kî mmufwanyine kwenza cintu mushindu umweumwe awu anyi? ["Amen."] Yêyè kî mmucyenzèku, diloolo ne diloolo dyônso, mwab'ewu anyi? ["Amen."] Mbanganyi bakaadiku babwele mu masangisha makwabo ne baMumone ucyenza? Elaayi anu cyanza muulu...["Amen."] Cya bushûwâ. Nwamonu anyi? Pa buloba bujima! Yêyè mmumanye, Yêyè mmumanye maalu ebe ônsò.

244 Mpindyewu nudi numona cîndi nteeta kwenza anyi? Mbanganyi badi bumvwa cîndi muswe bwa nwênù kwenza aci? Nwamonu anyi? Ndi muswe ne, kakuyi muntu mukutenteketele byanza to, ndi muswe ne wêwè, bu mùdì cintu cishuwashuwale cya Nzambi, wâmbè ne: “Yesu Kilisto, ndi muKwitabuuje. Ndi mpindyewu nKwitaba bu Mwondopi wanyi. Ndi mpindyewu nKwitaba bu Musungidi wanyi. Ndi ngiitabuuja nanku ne mwoyi wanyi wânsò, mudimu bwa byôbi abi mmumana kwenza.” Dîbà adi shaala mukwate mulayi awu, shaala mukwate ditonda dyebe kadi uye anu naadi kumpala. Tangila umone cidi cyenzeka. Nwamonu anyi? Tangila umone cidi cyenzeka. Nwamonu anyi? Mpindyewu ke cyôci aci cîndi nkeba kunufikisha ku dyenza, mushindu mulelela utudi ne cya kwitabuuja.

245 Udi ujinga kwamba bishi? [Muntu udi wamba ne: “Inaayi ne dikumi ne citeema.”—Muf.] Nomba inaayi, karta kaa disambila nomba inaayi ne kaa nomba dikumi ne citeema, ntupangike. Karta kaa disambila inaayi. Tapa dîsù kudi muntu kampanda; tapa dîsù ku twarta twa beena mutumba neebe aku. Karta kaa disambila nomba inaayi ne kaa nomba dikumi ne citeema. Eyo, katanci kakese cyanaana, indila. Nwamonu’s, mêmè nciyi mumubiikile to, nêmpetè dibinduluka pa bwalu abu, nudi numona’s. Wamba ne? Wamba ne? [“Inaayi.”] Nwâpeci inaayi anyi? Kadi dikumi ne citeem- . . . Dikumi ne citeema kî mmwanji kumweneka to. Wamba ne? [“Ne inaayi.”] Karta kaa disambila kaa nomba inaayi kî nkanji kumweneka to, anyi kaa dikumi ne citeema. Muntu yêyè ne twarta atu, bu nwênù mwa kuswa bwelaayi mu mulongo. Anyi, tangila, mona, cidi mwa . . . kudiku muntu kampanda ne . . . Mwânà mukese wa mu diboko wawa udi ne karta anyi? Kenketaayi, kabyena . . . Kî ng’awu nomba to. Inâbânzà udi mwaba ewu *ewu* udi ne karta anyi, mu dikalu dya balema edi? Kenketaayi nomba wende awu. Ki—ki nomba wende anyi? Inâbânzà mu kalaalu kaa babeedi, huh? Ûdi naaku. Bôbò, tûdimù twônsò mpindyewu. Eyo. Bîmpè. Mpindyewu—mpindyewu, nwênù badi ne twarta twa disambila abu, ikalaayi batulame. Netwikale mwa kunukwacila mudimu, ku ngâsà wa Nzambi.

246 Mpindyewu, balunda baanyi, bu mudibi ne edi ndiloolo dya ndekeelu ditwikala naadi, maalaba mmu dyalumingu mu mapingaja, twikalaayi batuujje. Mpindyewu angata bupidya bwônsò bùdì naabu ne meeji ônsò—ônsò a macimbakane awu, ubiteeke panshi, udyatepu dikàsà, mutùdì mwâ kwamba. Wâmbè ne: “Mukalenge Yesu, ndi muswe kuKwitabuuja.” Mbanganyi bènzà nanku awu? [Disangisha didi dyamba ne: “Amen.”—Muf.] Twasakidilaayi. Nzambi anubeneshe.

247 Mpindyewu muntu nansha umwe kùumukukù to. Sombaayi anu talala, biikàle biitabuuje. Tangilaayi mu mushindu ewu, nenku mpindyewu tangilaaayi.

248 Dimanyishiibwa dya Nzambi ditu misangu yònsò anu kumanya, kudyanjila kumona bikaavwàku, ne kwamba bikaadìku, mudi bwalu abu amu, anyi cìikalàku. Tudi bamanye aci. Mushindu awu nguvwa baprofeta bamanyika. Mushindu awu nguvwa Yesu mumanyike bu Maasiya. Ne Yèyè m'Maasiya umwèumwè awu leelu anu muvwaYe musangu awu amu, kadi kayi ne mubidi wa musunya pa buloba apa to. M'Mupingaje Nyuma Mwimpè bwa kukwata mudimu ne mubidi webe wèwè, mubidi wanyi mèmè. Mpindyewu, wèwè udi mufwanyine kwikala kuyi mukumbane kwenza cyôci eci to. Tudi bamanye ne, mu Mifundu, kudi umwepele mu lukongo. Kadi, nwamonu's, kadi nansha nanku nwènù nudi mwa kuciitabuuja, ne nudi ne bimwe bintu binudi mwa kwenza, muntu ne muntu.

249 Anji ambaayi tũng bu munu wanyi mwa kwangata dipangadika ne, bwalu wòwò kî ndisù dyanyi to, kawakwikala kabidi munu wanyi? Anji ambaayi tũng bu diboko edi mwa kwamba ne: "Ncyakujuukaku kabidi to, bwalu mèmè ncyèna dîsù to, anyi dici, ncyakwikalaku kabidi diboko to?" Mona's, aci's ncifwanyine kuvwija mubidi wanyi ne bulema.

Ikala cidi Nzambi mukuteeke bwa wèwè kwikala aci.

250 Mmisangu bũngi kaayi yínkaadì mwanyishaanyishe Oral Roberts, Billy Graham, Tommy Osborn!

251 Bamwe baa ku bantu abu badi babwela muntwamu bamba ne: "Butumbi kudi Nzambi's we! Itabuujayi bwalu abu!" Diitabuuja dya bukole bwa nyeke. Kuumuka kuya, kupatuka muntwamu mwikàle ne citaleela anu cyebe cya dikema eci.

252 Billy Graham wimana ne mukenji kampanda, wakula ne bantu mu tusunsa tukese, wamba ne: "Angata dipangadika; lwàku ku cyoshelu." Ushààla kacya wimana anu mwaba awu, kayi mwa kwenda dikwabo dikàsà to.

Awu ne: "Kadi utu wenza nanku bwa cinyi, Billy?"

253 Yèyè ne: "Mukenji wanyi mmumane kuya. Mmufumine kudi Nzambi." Ncya bushùwà.

254 Yèyè udi ku ekeleeziya wa Sodoma awu, anu menemene civwa ne cya kwenzeka. Dîna dyende dishiikila ne h-a-m wa ku Abraham, maleeta asambombo; Abraham uvwa yèyè ne mwandamutekete. Nudi numona musanjeela wa mwine ekeleeziya awu, mwamwa mu Baabulona anyi? Cya bushùwà's. Kakwenaku muntu nansha umwe mu ditunga dijima edi udi mukwate ne manza abidi mukenji wa kanyinganyinga awu, bu mudi Billy Graham to. Yèyè mmwimanyinepu. Padiye umuka mwaba awu, udi uya kadya cifweteke cya mufuba wa T kadi kuya kadyolola pa bulaalu, munwe mabeele matotesha ne malt. Abi's mbîmpè.

255 Kadi pakaadibi bikengela ne imanaaku ulwangane mvita ne badémóns! Musangu kampanda ku Long Beach, mèmè ne Mwaneetu Jack. . . Tatwèbè uvwa mwimane mwaba awu.

256 Ki Mukalenge Fuller uvwa mwimane mwaba awu, Charles Fuller, mwaneetu wa maalu mîmpè, mwimane uyiisha mwaba awu. Bantu batwe ku binunu bibidi anyi bisatu muntwamu mu mapingaja amu. Twètù kusòmba bwa kuteeleja mu disangisha dyende adi. Mémè mvwa mufute bwa kwangata dibalaasa adi, paanyima pende yêyè. Kwimanaye mwaba awu kadi kwenzaye muyiiki mulenga webe wa dikema. Yêyè ne: “Kudiku muntu mwaba ewu muswe kwitaba Kilisto anyi?” Bantu babidi anyi basatu kupwekabo e kulwa bwa dilambula dya bânà baabo baa mu maboko. Muntu mukaji umwepele kwambaye ne uvwa muswe kuCiitaba. Kuseemenaye kadi kwenza kaadisambila kakese, umwe wa ku balami, kwalukilaye e kusòmba. Balabulangana ku cyanza, bakudimuka kadi kupatuka. Ki cisumbu cyende cya bantu aci, beena mamanya a mu mitu bavwale mvwadilu wa kapelu, bapatuka muntwamu.

257 Ki baanyi paanyi badi babwela aba, ne tunkooci twa bapâle, makalu a balema, bampofu, bikalaba, balema, bilèmendà. Padi diitabuujja dyebe ditwilangana ne bintu bya mushindu awu!

258 Mpindyewu mwaba ewu, ncinyi cîndi mwambe ne ki cìdi Kilisto? Nenku mpindyewu beena bupidya basòmbè eku ne eku, bakeba paa kwangwilabo kalema nansha kamwe, nwamonu’s, bakeba anu bwa kwangulaku kalema nansha kamwe.

259 Vulukaayi ne, abidi adi panshi aa mu Toronto emu, tuvwa biimane muntwamu tuyiisha, tusambidila babeedi. Mvwa ànu ngenze kuumvwa nyuma wa pabwende; ùvwa musòmbèle lwà ku dyabakaji dyanyi aku. Mémè kutungunuka anu ne kumutabaleela. Kuvwa muntu mulume musòmbè mwaba awu, kusùmbà wa bantu uvwa mumufute mfranga bwa kulwaye kumpongola lungenyi. Ùvwa mwa kuya mu tumpoonyi twa basalaayi ubenzeja bwa kukalababo ne kubulukabo bu mbwa, ne bikwabo; mupongo’s. Mémè kuumvwa nyuma mubi awu. Ncivwa mumanye ne kuvwaye ufumina nkwepi to. Mémè kutungunuka ne kumutabaleela. Mémè kumona mundidimbi mufiike awu. Mémè kwanji kwindila ndambu wa tusunsa. Mémè kwamba ne: “Wèwè mwânà wa Sataana, bwa cinyi dyabulu mmukufomije lungenyi kadi kukutuma ku cintu cya mushindu awu? Bwalu wâlu bwa kukika Nzambi, kwela Nyuma wa Nzambi kadyombo, nebapatuke nebe mwambula mwaba ewu.” Wàkacibukila panshi anu mwaba awu mu nkwasu uvwaye awu ne ùcidi anu mucibukile panshi. Nwamonu anyi?

260 Ekeleeziya kî mmanayi twenza to. Mbanganyi bàkaadiku balwe mu masangisha bamone bintu bya mushindu awu byenzeka, biikàle bamanye bintu bidi byènzekà? Cya bushùwà’s. Mmwômò. Vulukaayi ne, nwikale—nwikale ne kaneemu.

Mpindyewu, mùndi ngeela meeji, muntu wa kumpala nyêyè ewu. Mmwômò anyi?

261 Mpindyewu, nwamonu's, ngaayiishi, ngǎnwǎmbìdì anu menemene civwa ne cya kwenzeka mu dituku edi. Mpindyewu aci ncimanyinu, cyôci cyenzeka. Ki civwa cimanyinu ncyôci aci, dibà adi itabuujaayi Dìyì dìdì dilondà cimanyinu. Nwamonu anyi?

262 Mpindyewu muntu mukaji nyêyè ewu. Anu menemene, bwenu nwènù beenyi, eci cidi Yone 4, muvwa Mukalenge wetu Yesu mutuutakeene ne muntu mukaji kampanda ku ciinà cya mâyi. Kabavwaku banji kutuutakeena to, kacya baabalela, ki Yêyè kwambila mukaji awu civwa lutatu lwende. Ki yêyè awu kujingulula ne ùvwa m'Maasiya. Nutu bamanye bwalu abu anyi? Kì bwòbò ebu cyakabidi, Nuntu mulume ne muntu mukaji batuutakeena. Mpindyewu yêyè ewu kî nyêyè mukaji awu to, ne mémè ncyèna Muntu mulume awu to, kadi ùcìdì anu Nzambi umwèumwè awu. Nwamonu anyi? Mpindyewu, Yesu wakamba ne: "Byenzedi bìndì Mémè ngenza nenùbyènzè peenu," Yone Munsantu 14.12.

263 Mpindyewu, inǎbǎnzà, nciyi mukumanye to, ncyèna nansha ne cingenyinyenyi cya ne cyùdì mwimanyine mwaba awu ncinyi to. Ncifwanyine kwikala lutatu lwa ku lubanza. Ncifwanyine kwikala bwa muntu mukwabo. Pàmwápa ngwèwè udi usaama. Pàmwápa cidi. . . Pàmwápa udi mwimane mwaba awu, udingidija anu cintu kampanda. Piikalabi ne ncyôci, jandulaaku cidi cyènzekà. Wamonu anyi? Pàmwápa udi widikija cintu kampanda. Nansha ciikàle cinyi, ncyèna. . . Udi mwa kwikala mwena kwitabuuja mushuwashuwale. Aci ncyèna mumanye to, kadi Nzambi mmumanye. Kadi wèwè neumanye ne Yêyè mmukwambile bulelela anyi kî mbulelela, kî mmwòmò anyi? Piikalaci bulelela, neubumanye.

264 Mpindyewu, monaaku, ki cidi cikengela bwa diitabuuja dyebe kwenzadi. Udikù mwa kwanji kulwila apa anyi? Mpindyewu muntu yêyè wela meeji ne mbya mafi, lwáku apa wangate mubeedi ewu, lwáku apa wangate bakwabo aba. Nenku pawikala kuyi muswe kucyenza to, kumpiishi to. Nwamonu anyi?

265 Mpindyewu tangilaaku kuneeku, mwaneetu wa bakaji, anu kakese cyanaana. Mpindyewu ncyèna ne cingenyinyenyi nansha cikese, nansha cintu kampanda pa bidi bikutangila to. Wèwè udi peebe anu muntu mukaji mwimane mwaba awu.

266 Mpindyewu pìikalà Mukalenge Yesu Kilisto, Mwànà wa Nzambi, Yêyè ùngààjaadikì ne Bible ewu, mulaye ne Yêyè neapingane mu matuku a ndekeelu ne neadibuulule Yêyè mwine mu kaabujima kaa Nyuma Wende. . .

267 Anu mudi Ekeleeziya wenda ubanda; anu mùdìbi bwa muntu, kuumukila anu ku makàsà, ùbànda ùfika ku bibelu, ùbànda ùfika ku mutu, ne mutu awu mmutu wa mubidi. Nenku Mubidi mmubànde, kubangila ku Ekeleeziya wa kumpala,

wènda ùbànda, mu cyôci eci, mu dilongolola, mmubànde, too ne mpindyewu. . . Mmupicile mu dibingishiibwa, dijidiibwa, dibatiiza dya Nyuma Mwîmpè. Mpindyewu m’Mutu, Kilisto, ulwa kudi Mubidi, Mubidi wa Kilisto. Yêyè ki Udi mumanye. Cyanza cyanyi kî ncimanye kwenza bwalu to, anu ku bulombodi bwa mutu wanyi. Kadi Yêyè ki Udi mumanye, ki bwa cinyi Yêyè udi Dîyì.

²⁶⁸ Mêmè kî ngudi Dîyì to. Mêmè ndi muntu. Kadi, nudi numona’s, Yêyè udi ukwata mudimu ne mubidi ewu. Bwalu, Yêyè wakafwa bwa kujidila mubidi ewu, bwa Wamona mwa kukwata naawu mudimu, ne kufila dipà kampanda. Mbyenze anu bu mudi kuwukokela mu biteshi, pashiishe Nyuma Mwîmpè wangacila apu.

²⁶⁹ Nenku, bu Yêyè mwa kukuumvwija anyi kukwambila byûdi mwenze, cyûdi muvwile mwaba ewu, anyi cintu kampanda cidi cikutangila, neûcîtàbùùjè. Ne bateeleji nebiitabuuje mushindu umweumwe awu anyi? [Disangisha didi dyamba ne: “Amen.”—Muf.] Mukalenge Nzambi anyisheku acifile.

²⁷⁰ Mpindyewu ndi ngangata nyuma yônsò, muneemu emu, mu bukontononyi bwanyi mêmè, bwa butumbi bwa Nzambi. Mpindyewu sòmbaayi talala. Kanwendakanyi eku ne eku to.

²⁷¹ Tangila kuneeku, katanci kakese cyanaana. “Ntàngile,” bu mwákambà Peetelo ne Yone, paakabwelabo ku ciibi. Mu ngaakwilu mukwabo ne, teya anu ntema ku bîndi ngamba. Wamonu anyi?

Yesu wakeela mukaji awu ndambu wa nkonko. “Ntwàdileku mâyi a kunwa.”

²⁷² Nwamonu’s, ngaayiishi, cintu cimwecimwe aci. Taatù ngudi muntume kuneeku ku—ku Baton Rouge eku. Nyewu ndi apa.

²⁷³ Taatù wakamba ne Yêyè uvwa ne dijinga dya kupicila ku Samaaleya. Wàkasòmba mwaba awu. Muntu mukaji ki wa nzànzànà wàkalwa kudiYe. Kwenzaye cimanyinu cimwepele aci pa mukaji awu, kadi cimenga cijima cyakanyingalala. Dishiihangana kaayi didi. . .

²⁷⁴ Nudi nwela meeji ne, bu Yêyè mwa kwenza cintu cimwecimwe aci, diloolo edi, nudi nwela meeji ne Baton Rouge mujima mmufwanyine kunyingalala anyi? Mêmè ndi ngeela mpatà bwa aci, kanwena peenu nuumvwa nanku anyi? Ncya bushùwà ne ndi ngeela mpatà. Kadi tudi ku matuku a ndekeelu, kudi bubi butambe bubi kutamba bya kacya bantu baabumanya.

²⁷⁵ Mpindyewu maalu a mu nsòmbelu webe. Udi mwaba ewu mbwa kukusambidila. Cya bushùwà menemene. Nenku udi usaama muminu. Pìikalà aci cya bushùwà, ela cyanza muulu. Kaciyi anu aci to, kadi kudi muntu kampanda ûdi usambidila. Mmwànà, ne mwànà mwine awu udi ne bya pa muminu. Nenku ki disaamà dya pa muminu dya mwànà, mbyújà

bya pa muminu. Udi witabuuja ne Nzambi neamwondope, yèyè pende anyi? Mushwala udi mu cyanza cyebe awu, uwèdi muulu kudi Nzambi awu, bu bujaadiki. . . Mpindyewu kùcyèdi mpatà nansha. Ndaaku ukatenteketele mwànà awu mushwala awu. Kwedi mpatà to, ne mwoyi webe wònsò. Nzambi neànwòndòpè nwènù bònsò babidi kabidi anupe bukole bwa mubidi. [Mwaneetu wa bakaji udi wamba ne: “Atumbishiibwe! Aleluuyah!”—Muf.] Udi mwa kwenza nanku anyi? [“Yesu! Twasakidila, Yesu!”] Nanku ndaaku, ne Mukalenge ikale neebe. [“Butumbi kudi Nzambi’s we! Aleluuyah!”]

Wetwawu! Katwena bamanyangane to, twètù peetu.

²⁷⁶ Nudi nwitabuuja anyi? [Disangisha didi dyamba ne: “Amen.”—Muf.] Ki cimanyinu ncyôci aci. Mpindyewu Dìyì, didi ne: “Alukilaayi ku Dìyì!”

²⁷⁷ Mémè ncyèna mukumanye to; Yèyè ngudi mukumanye. Bu Yèyè mwa kungambila cintu kampanda cidi cikutangila, dîbà adi newitabuuje ne Dìyì dîngâmbi adi nedishindikiibwe anyi? Dishindikiibwa dyaDi ki dyôdi—ki dyôdi adi. Wamonu anyi? Ngâmbi ne Yèyè mmucyènzè; ki ciprofeta ncyôci aci. Mpindyewu bu ciprofeta mwa kwenzeka, nenku Yèyè wakamba ne: “Nuciteelejaayi.”

²⁷⁸ Wèwè ewu udi ne mutu ukunyunguluka bikole wùdi usaama, disaamà dya mutu ukunyunguluka. Kabidi udi ne cyûjà cya kansere, ne cyûjà aci cidi ku mukolo webe aku. Ncya bushùwà, kî mmwômò anyi? [Mwaneetu wa bakaji udi wamba ne: “Eyowa.”—Muf.] Udi witabuuja mpindyewu anyi? [“Eyowa’s, mukalenge.”] Nenku kwata njila ndaaku, wikale mwitabuuje. Nenku, muwítàbùùjì amu, ki mwakwenzekelabi.

²⁷⁹ Wetwawu! Mémè ncyèna mukumanye to, kadi Nzambi ngudi mukumanye bîmpè. Udi witabuuja ne Nzambi udi mwa kungambila ntatu yebe anyi? Ntàngile. Udi ne ntatu. Kadi mu bushùwà bwa bwalu udi mwimane mwaba ewu mbwa muntu mukwabo, mwine awu ngunudi bakole nende. Mmwaneenu wa bakaji. Ncya bushùwà. Mpindyewu udi witabuuja ne Nzambi udi mwa kungambila cidi citacisha mwaneenu wa bakaji awu anyi? Neùcítàbè anyi? Yèyè awu udi ne disaamà dya mwoyi. Ncya bushùwà. Udi witabuuja ne yèyè neondopiibwe mpindyewu anyi? Nanku, bilondeshile diitabuuja dyebe, bikwenzekele nanku.

²⁸⁰ Lwâku, inâbànza. Wetwawu! Bu Nzambi mwa kungambila cidi cikutacisha, anyi cyûdi mwenze, anyi cintu kampanda, necikwitabuujiye anyi? Udi mumanye ne mémè ndi. . . Mémè—mémè—mémè nciitu mukumanye to. Ncifwanyine kwikala ngiikadilu Wende mwikale udimanyishila Yèyè mwine mu mémè, bilondeshile Dìyì dyakalayaYe. [Mwaneetu wa bakaji udi wamba ne: “Ndi anu ne cya kuciitabuuja.”—Muf.] Udi witabuuja nanku anyi? [“Eyowa. Amen.”]

281 Wêwè udi mukwabo, udi ne ntatu bu mudi mukaji wa bukole bwebe ebu mufwanyine kwikala naayi, kadi meeji ebe menemene adi bwa muntu mukwabo. Dijinga dyebe kudi Nzambi; udi ukeba Nzambi kî mbwebe wêwè mwine to, kadi mbwa muntu mukwabo, mmuntu mulume. Mbayeebe. Yêyè mwine udi ne òsaamà dya mwoyi. Udi witabuujà ne Yêyè. . . Nzambi neamwondope anyi? Ndaaku, itabuujà cyòci aci. Nenku, bu muwītàbùùjì, kî mwakwenzekelabi nanku.

282 Mpindyewu, nwamonu's, kuyiisha kwònsò aku, kwa dîbà dijima dîmvwà nyiisha adi's. Aci, cyònsò civwàci mwa kwikala aci, bantu basatu anyi banaayi kî bāpici, mpindyewu byankoledi bwa kwimana mwaba ewu. Nwamonu anyi? Nwamonu's, musùmbà mujima udi umweneka anu bu wùdì mu ditutu ditooke bu mabeele, muneemu mwònsò emu. Nwamonu anyi? Yesu wakamba ne: "Dikanda ndipatuke mu Mêmè." Kadi pìikalà muntu mukaji umwepele, kulenga kwa civwalu Cyende, kwakapatula dikanda mu Yêyè, wa bwalu Yêyè awu Mwànà wa Nzambi, netwámbe cinyi bwanyi mêmè ewu, ngènzàmpèkààtù musungila ku ngàsà Wende?

283 Yêyè wakamba ne: "Byenzedi bìndì Mêmè ngenza nenùbyènzè peenu. Nenwènzè *byàbùngì* bipite ebi." Ndi mumanye ne King James udi wamba ne, "bitambe bunene." Kadi nwènù bangate nkudimwinu wa ku muji, mmwambe ne: "Nenwènzè *byàbùngì* bipite ebi." Kakwena muntu udi mufwanyine kwenza bitambe bunene nansha. Yêyè wakabiisha bafwe, ne Wakiimanyika bufuki, ne kwenza bintu byònsò. Kadi Wākamba ne: "Nenwènzè *byàbùngì* bipite ebi, bwalu Ndi nya kudi Taatù."

284 "Baa pa buloba kabaakuMmona to; kadi nwènù nenuMmone, bwalu Mêmè. . ." Tangilaayi, "Mêmè," Mêmè—mêmè mmupinganyi muleeji muntu. "Mêmè nêngìikalè neenu, munda mwenu mene." Dîbà adi, kî mmuntu to. N'Kilisto.

285 Ndi ngamba aci, ndinyukulula ndambu mu mushindu kampanda, ndyaluja mu mêmè mu mushindu kampanda. Udi ukafika too ne kaaba kampanda mu mushindu wa ne paanyima paa katanci. . . Kî mpaudi kuulu *kwaka*, anyi panshi *apa* to; mmunkacinkaci amu. Mbanganyi badi bumvwa aci? Ndi mumanye ne nudi—nudi nwela meeji ne nudi nuumvwa. Nansha mêmè, kî mudibi.

286 Nutu bamanye ne bafundi baa tusala ne baprofeta batu anu banyunguluke mitu anyi? Mbanganyi badi bamanye aci?

287 Mbanganyi bàkaadiku bumvwe bwalu bwa William Cowper, mufundi munene wa tusala wa ba-Anglais awu? Nudi bamanye's, nyêyè wākafùnda ne: "Kudi mpokolo mùle ne Mashi, makoka mu mijilu ya Emanuwele." Paanyima paa yêyè mumane kufunda mwine musambu awu, nukaadiku bumvwe cyākamwenzekelà anyi? Mvwaku mwimane pabwìpi ne lukita lwende anu abidi adi

panshi aa. Wàkakèba bwa kudishebeya, ne kudyelaye mu mâyi bwa kufwaye.

²⁸⁸ Mbanganyi bàkaadiku bumvwe bamba bwa Stephen Foster, mwine wàkapà Amerike misambu yende ya mitambe bwimpè ya bwena mwabo awu? Yêyè uvwa naayi mu mutu kadi kayi naayi mu mwoyi to. Musangu wònsò uvwa anu disonsodiibwa dimwikila, yêyè uvwa mwa kufunda musambu. Pashiishe pavwa disonsodiibwa dimuumuka, ùvwa ùpanga cya dyenza, nenku ùvwa ujimija lungenyi's. Ùvwa—ùvwa—ùvwa mukwacike maala. Kadi ndekeelu wa byònsò paakabangaye kupatuka mu disonsodiibwa adi, kubiikilaye musadidi wende, kadi kwangataye kapaaya ne kudishebeyaye. S'ncyà bushùwà.

²⁸⁹ Tangilaayi Eliya, muprofeta. Kubàndayè kuntu kwaka e kubiikila mudilu mu dyulu; kubiikilaye mvula mu dyulu dituku dya kumpala adi; kukangaye maulu ne kwenzaye byònsò abi. Pashiishe pàakalwà disonsodiibwa kuumumuka, kupatukaye e kubwela mu cipeela ne kukebaye bwa kufwa. Ki Nzambi kumusangana, paanyima paa matuku makumi anaayi, mudikokele mu nyongolo. Ncyà bushùwà anyi?

²⁹⁰ Tangilaayi Yona, muprofeta. Paanyima paa mumane kufila mukenji wende, wàkabànda pa kakuna e kusòmbayè, ulomba Nzambi bwa kumulekela kufwaye. Uh-huh. "Lekèlà musadidi Wèbè àyè byàndi mu ditalala."

²⁹¹ Bantu kabatu bacyumvwa to. To, to, kanwakucyumvwa to. Nansha mèmè ncyèna mwa kucyumvwiya to, nansha muntu kaayi mukwabo yònsò. Kwèna mwa kuumvwiya Nzambi to. Nzambi katu umanyiibwa ku bukebikebi bwa maalu a mamanya to. Nzambi utu umanyiibwa nku diitabuuja. Tudi tuMwitabuuja. Udi mwa kuumvwiya munyi? Neciikale kabidi diitabuuja munyi, mwaba awu? Tudi tumanya Nzambi nku diitabuuja.

²⁹² Ekeleziya kaadyakumanyaku mudimu mukole ne dizengela, ne mudimu wa lutatu ne diteeta, ku diditacisha bwa kuWutwala to, Mukenji ewu. Yêyè ngudi mumanye. Difutu dyanyi kadyena difumina kudi bantu to.

²⁹³ Tangila kuneeku, inàbànzà. Eyo, lukasalukasa. Mukaji wawa mmubwikila kudi mundidimbi wa lufu. Nzambi kayi mulwe lukasa kudi mukaji wawa to, mèmè ndi mwa kumona. . . Kanwenaayiku peenu numona cintu cifiike cidi cilembelele cimunyungulukile cyacya anyi? Yêyè's neafwe, anu mudibi bulelela ne buloba budiku. Anu abidi adi panshi aa, mbakwate fòtò wa cintu cya mushindu wawa, ne mèmè ndi nende kumbelu. Ùdi ne mundidimbi mufiike mulembelele pabwipi nende. Mmubwikila kudi mundidimbi wa lufu.

²⁹⁴ Inàbànzà mutekete ewu mbamupande. Ne mu diine dimupanda adi, mbapande kansere. Kadi mpindyewu ùkaadi upeta ntatu, mishindu yònsò ya—ya, ee, anu ntatu pa ntatu mikodyakanangane. Cintu cimwe ncyà ne, udi ne butekete mu

mushindu wa kuyi mwa kwimana kuulu to. Cintu cikwabo ncyà ne, mu kalondo kaa mēnyi amu mudi mupatuka tufina. Mpindyewu, anu bwa umone ne ncyēna ngamba anu cintu kampanda bwa kwamba to. Wamonu anyi? Aci ncyà bushùwà. Kadi, inābānzà, ngangabuka's mmuteete. Ndi mmupa luumu bwa bwalu abu. Kadi, yēyè uvwa ndikwacisha cyanaana, kadi Nzambi ki dyondopa diine. Wēwè neufwe bwà abi. Yēyè nyawu mwenze mwende pende mwōnsò mwa kwenza. Udi witabuuja anyi? [Mwaneetu wa bakaji udi wamba ne: "Eyowa."—Muf.] Vwilabi apa, katanci kakese cyanaana.

295 Ku mudimu muntuma naawu kudi Nzambi wa Bukole bwōnsò, munjaadikila kudi Mwanjelo, udi mwaba ewu mpindyewu mu mmwenekelu wa Dikunji dya kapyà awu, ndi mpiisha démon udi munkaci mwa kwangata mwoyi wa mukaji ewu ewu. Mu Dîna dya Yesu Kilisto. Amen.

Ndaaku, itabuuja mpindyewu. Ne byōnsò bidi munda mwebwe amu, itabuuja.

296 Wēwè udi ne dīsaamà dīdī dishipa bantu bapite būngī kutamba cintu cikwabo kana cyōnsò, dīsaamà dya mwoyi. Batu bamba ne ki dīsaamà dīdī dītambē ōnsò, kadi kī mmwōmò to, mukalenge. Mpekaatu ki dīsaamà dīdī dīitābūjībwe ne . . . ndīdī dītambē ōnsò. Udi witabuuja ne Yēyè udi ne bukole bwa kwondopa dīsaamà dya mwoyi adi ne kukusangaja anyi? [Mwaneetu wa balume awu udi wamba ne: "Ndi mumanye ne Yēyè udi ne bukole abu."—Muf.] Nanku ndaaku, itabuuja nanku awu. Nzambi akubeneshe.

297 Udi wela meeji ne Nzambi udi mwa kukwondopa nyima ne kukusangaja anyi? Udi uciitabuuja ne mwoyi webe wōnsò anyi? Ndaaku, itabuuja nanku, mwaneetu wa bakaji. Utangile bwa kumona cidi cikwenzekelà, neūmvwèku bīmpè.

298 Binyoka ne dīsaamà dya mwoyi. Kadi udi witabuuja ne Nzambi udi mwa kukusangaja anyi? [Mwaneetu wa bakaji udi wamba ne: "Ndi ngiitabuuja."—Muf.] Ne mwoyi webe wōnsò anyi? ["Eyowa's, mukalenge."] Neūcītābè anyi? ["Eyowa's, mukalenge."] Bilondeshile mushindu wuwītābūūjī, mushindu awu ngwikalabi kūdī. Mpindyewu ndaaku, ūcītābūūjè ne mwoyi webe wōnsò, Nzambi neakusangaje.

299 Wēwè udi peebe ne dīsaamà dya nyima. Udi witabuuja ne Yesu Kilisto udi mwa kukusangaja anyi? [Mwaneetu wa bakaji udi wamba ne: "Eyowa's, mukalenge."—Muf.] Ndaaku mpindyewu, ūcītābūūjè ne mwoyi webe wōnsò. Mēmè kī ngudi mwa kukwondopa to, wamonu's.

300 Mpāci wa mēnyi, dīsaamà dya mutu unyunguluka, udi kabidī ne binyoka. Udi witabuuja ne Nzambi udi mwa kukusangaja, kukwondopa anyi? Udi uciitaba anyi? Nanku, ndaaku, ūcītābūūjè.

301 Cìdi cìkulama mu citabeela misangu yàbùngì, ndikolola. Kadi Nzambi utu wondopa disaamà dya mfwenke. Udi witabuuja nanku anyi? [Mwaneetu wa balume udi wamba ne: “Eyowa’s, mukalenge.”—Muf.] Udi witabuuja ne Yèyè udi ukusangaja mpindyewu anyi? [“Eyowa’s, mukalenge.”] Nzambi akubeneshe. Twasakidila, bwa diitabuuja dyebe.

302 Amba tǔng bu ne ncyèna mukwambile dīyì nansha dimwe, mukutentekele anu byanza cyanaana, uvwa mwa kwitabuuja anyi? [Mwaneetu wa balume udi wamba ne: “Eyo.”—Muf.] Lwâku apa. Ndi nkutentekela byanza, mu Dîna dya Yesu Kilisto, ne binyoka abi bikuumuke. Bidi byumuka.

303 Lwâku. Lwâku, mwaneetu wa bakaji. Udi witabuuja anyi? [Mwaneetu wa bakaji udi wamba ne: “Eyowa’s, mukalenge. Ntu nkààdikù mwondopiibwe kudi Mukalenge.”—Muf.] Ee, abi’s mbilenga bya dikema. [“Aleluuyah!”] Nanku ndaaku ukadye didya dyebe dya diloolo, nenku cifu cyebe neciikale bîmpè. [“Aleluuyah! Aleluuyah! Aleluuyah!”]

304 Nyima ùkusaama bikole, ùdi ùkutacisha kukaadi ntanta mule. Ndaaku, mwikale witabuuja ne udi...Ndaaku, mwikale witabuuja ne neũmvwè bîmpè, nenku Nzambi neakwenzeleci. [Mwaneetu wa balume udi wamba ne: “Nzambi wăcyènjì. Amen.”—Muf.] Amen. Abi’s mbîmpè. [“Mukalenge atumbishiibwe.”] Mukalenge akubeneshe, mwaneetu. Amen.

305 Dìsaamà dya nsukaadi kî ncentu to, bwa Nzambi kudiyondopa. Yèyè udi mwa kudiyondopa. Udi witabuuja aci anyi? [Mwaneetu wa bakaji udi wamba ne: “Ndi ngiitabuuja.”—Muf.] Bîmpè. Itabuuja nanku, ne nda uMwitabuuje mpindyewu ne mwoyi webe wònsò.

306 Ne wèwè peebe udi naadi mu mashi. Udi witabuuja ne Nzambi neakusangaje anyi? Ndaaku, itabuuja nanku ne mwoyi webe wònsò, usangale.

307 Udi witabuuja ne Yèyè wakwondopu paakulengici apu anyi? Mmukwondope.

308 Dìsaamà dya bakaji. Dìsaamà dya mwoyi. Udi uciitabuuja anyi? [Mwaneetu wa bakaji udi wamba ne: “Ndi nciitabuuja.”—Muf.] Ndaaku, ikala—ikala mwondopiibwe mu Dîna dya Yesu.

309 Udi witabuuja ne Nzambi neakwondope nyima, ne twonyi twebetwikale. . . Akubeneshe! Tungunuka uye anu kumpala.

Mémè ncentu ngondopa to. Mémè ncyèna mwa kwondopa to. Ncyèna mwondopi to.

310 Udi mufwanyine kwela meeji kaayi pǎmbiYe bwa nyima wende awu apu, udi witabuuja ne, webè mmwondopiibwe pende anyi? Bîmpè, ndaaku anu cyanaana, mwikale uciitabuuja, nenku. . . Nda anu cyanaana ùcītàbùùjè, ne mwoyi webe wònsò.

311 Ne webè awu pende, udi witabuuja ne Nzambi udi ukusangaja anyi? Ndaaku, ùcìtàbùùjè, ne mwoyi webe wònsò. Nzambi neakwenzeleci wèwè. . .Kadi, bikengela wèwè kuciitabuuja nansha nanku.

312 Wèwè peebe, udi witabuuja ne Nzambi neakusangaje anyi wèwè? [Mwaneetu wa bakaji udi wamba ne: “Mukalenge atumbishiibwe! Ncya bushùwà ne ndi ngiitabuuja.”—Muf.] Bìmpè. Nzambi akubeneshe. Nda anu kumpala cyanaana ne itabuuja ne mwoyi webe wònsò.

313 Lwâku, mukalenge. Dimata ditooke dya kale òmata panshi. Dijandula dya aci ndifwanyine kuleeja disaamà dya nsukaadi. [Mwaneetu udi wamba ne: “Dìsaamà dya nsukaadi.”—Muf.] Udi witabuuja ne Yèyè neakusangaje anyi? Tuyaaku ku Kalvariyo bwa dikwela dya mashi mpindyewu. Ku diitabuuja, mu Dinà dya Yesu Kilisto, swaku bwa yèyè ondopiibwe. Amen. Nzambi akubeneshe, mwaneetu. Itabuuja ne mwoyi webe wònsò. Udi witabuuja anyi? [“Ncilelela menemene.”]

314 Kadi bishi bwa bamwe baa kunudi bàdi mu bateeleji mpindyewu? Nudi nwitabuuja ne mwoyi wenu wònsò ne, Yesu Kilisto udi umwèumwè awu makeelela, leelu, too ne kashidi anyi? Nudi nwitabuuja aci anyi? [Disangisha didi dyamba ne: “Amen.”—Muf.]

315 Kadi bishi bwa mu citupa *eci*? Inàbànzà mutekete udi musòmbe, udi kacya wantangila wawa, usaama disaamà dya bakaji, udi witabuuja ne Nzambi neakusangaje anyi? Mmuvwale anu kankooci kakese kàà bleu. Bìmpè. Itabuuja mpindyewu, Yesu Kilisto udi ukusangaja. Mbipeepele anu bya menemene.

316 Inàbànzà udi musòmbe anu paanyima peebe menemene awu, ne nsuki mifiike. Wàmbi ne: “Twasakidila, Mukalenge.” Cintu kampanda cyamulengi. Kavwa mumanye ne Civwa ncinyi to. Disaamà dya kalondo kaa mènýì dyakuumuku, wèwè udi musòmbe mwaba wawa naka wawa, paanyima menemene paa inàbànzà wondopiibu katanici aka awu. Wèwè mwitabuuje ne mwoyi webe wònsò mwaba awu, inàbànzà. Udi witabuuja anyi? Bìmpè, ela cyanza muulu pawikala muswe kuciitaba. Nzambi udi ùkusangaja.

Kadi bishi bwa eku lwà patudi tupweka apa, muntu kampanda muneemu *emu*?

317 Kunudi aku mu bateeleji amu, mpindyewu ikalaayi mu kaneemu kaa menemene. Kanwendakanyiku to. Nwamonu’s, masaama aa adi umuka kudi muntu aya kudi mukwabo.

318 Kadi bishi wèwè, mukalenge? Muntu mushindame udi musòmbe apa mu ewu nkwasu ewu? Udi witabuuja anyi? Udi witabuuja ne Nzambi udi mwa kukwondopa anyi? Binyoka, udi kabidi ne lukoso. Udi witabuuja ne Nzambi neondope ciine aci anyi? Udi witabuuja anyi? Bìmpè, udi mwa kupeta cyùdi mulombe aci. “Bu wèwè mwa kwitabuuja!”

319 Udi peebe wela meeji kaayi, inàbànzà, wèwè udi musòmbe ku luseke lwende ewu? Udi witabuuja peebe anyi, wèwè? Udi witabuuja anyi? Udi witabuuja ne Nzambi udi mwa kungambila cidì lutatu lwebe anyi? Udi kule naanyi bikole. Wèwè uMwitabuuje anu cyanaana mpindyewu. Udi witabuuja ne ndi mukwambile Bulelela anyi? Nanku disaamà dyebe dya lwendu lwa mashi aya lubilulubilu adi nedipweke. Udi uciitabuuja anyi?

320 Uvwa peebe mwele cyanza muulu, wèwè. Uvwa uteeta bwa kumukolesha ku mwoyi. Udi witabuuja ne Nzambi udi mwa kungambila ne ncinyi. . . Udi mudileeje ne musangeelu wàbúngì bwa kumukwacisha yèyè, mpindyewu Nzambi neadileeje ne musangeelu bwa kukukwacisha wèwè. Udi ne lutatu lwa nyuma ludi lukutacisha. Piikalabi ne ncyà bushùwà, nyungisha cyanza cyebe mushindu ewu. Bwalu abu nebulongoloke mpindyewu. Yèyè ngudi ubulongolola.

321 Mbanganyi badi biitabuuja? Mbanganyi baa kunudi badi baswe kwitab-. . . ewu udi kayi mwena Kilisto to, udi ne— ne luumvu lwa ne Yesu Kilisto udi kaaba aka, udi muswe bwa kujuuka kuulu mpindyewu, kwamba ne: “Yesu, mèmè ndi muswe bwa kumanyishiibwa bu ngènzàmpèkààtù, udiku Wèwè mwa kwanyisha bwa kumfwila luse ku mpekaatu yanyi anyi?” Juukilaayi kuulu. Nzambi akubeneshe, mukalenge. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Eci, Yèyè mmukumone. Yèyè mmufunde dìnà dyebe paudi wenza nanku apu.

322 Lwà mu cisasa emu, juukilaayi kuulu, nwàmbè ne: “Mukalenge Yesu, ndi muswe, ndi muswe kumanyishiibwa. Ndi njinga luse bwa musuuka wanyi.” Nzambi akubeneshe, mukalenge. “Ndi njinga luse, Mukalenge Yesu.”

323 Kwèna mwa kumonaku anyi, mulunda wanyi, ne n’Yèyè ewu mwaba ewu? Nzambi akubeneshe, nsongaalume. Nzambi akubeneshe. Nzambi akubeneshe, nsongaakaji. Ki cintu citambe bunene cyûkaadiku mwenze kacya. Mpindyewu muntu kampana udi kayi mwanji kucyenza to, juuka kuulu, amba ne: “Ndi muswe kumanyishiibwa, Mukalenge Yesu. Mmèmè ewu ndimanyisha, diloolo edi.”

324 “Ewu wâtonda mpekaatu wende, neafwidiibwe luse. Ewu udi usokoka mpekaatu wende, kaakutantaku to.”

325 Udi muswe anyi, mu Bwikadi Bwende emu? Nzambi akubeneshe, inàbànzà. Ndi muswe. . . Nzambi akubeneshe. Eyo. Ne Nzambi akubeneshe. Nzambi akubeneshe, mukalenge. Nzambi akubeneshe, inàbànzà. Mukalenge akubeneshe.

326 Udi wamba ne: “Aci cidì ne cidìci cyumvwija anyi?” Pankaci paa lufu ne mwoyi, ki dishiilangana ndyôdi adi.

327 Nudiku nujingulula Bwikadi Bwende mwaba ewu anyi? Nudiku nujingulula aci anyi? Nudiku nucyumvwa anyi? Nwamonu's, nudi nuBumona, nudi nuBumona bukwata mudimu. N'Yèyè awu. Ki cyôci aci menemene cyakambaYe ne Neénzè. Nudi nuciitabuuja anyi? [Disangissha didi dyamba ne: "Amen."—Muf.]

328 Muntu mukwabo ämbe ne: "Ndi muswe kudimanyisha bu ngènzàmpèkààtù, Mukalenge. Umfwileku luse ku mpekaatu yanyi mpindyewu." Pawikala mumane kujuukila kuulu, ela anu cyana cyebe muulu cyanaana. Bamwe baa kunudi badi benda balonda cimanu baba, elaayi... Nzambi akubeneshe. Nzambi akubeneshe. Muntu mukwabo, muulu mu cisasa lwa paanyima pààpa, ämbè ne: "Ndi muswe kudimanyisha, Mukalenge Yesu. Ndi ndomba luse, diloolo edi, mu Bwikadi Bwebe bwa Bunzambi, mwikale ngiitabuuja ne, Nzambi mene wikala mwa kundumbulwisha awu, Bwikadi Bwende budi apa mpindyewu. Mmumanye ne Yèyè ngudi munkaci mwa kwakula ne mwoyi wanyi ne ungambila mùndi mupiile awu. Ndi muswe kwimanyina kuulu bwa kwamba ne ndi mupiile. Ndi ntonda dipiila dyanyi. Wèwè ngudi munkaci mwa kumpiisha ewu, mu mwoyi wanyi." S'ki cingimanyikidi mulongo wa babeedi. Nzambi akubeneshe. Nzambi akubeneshe.

329 Nudi nwela meeji ne ngáwimànyikidi cinyi? Ndi muwimànyike bwalu mvwa mumanye ne aci civwa ne cya kwenzeka.

330 Mpindyewu, kudi bakwabo mwaba ewu, kanwenaayiku baswe kujuuka anyi? Juukila kuulu wämbè ne Cintu kampanda cidi munkaci mwa kwakula ne mwoyi webe ne: "Udi mupiile." Nzambi akubeneshe, mukalenge. Nzambi akubeneshe. Nzambi akubeneshe. Nzambi akubeneshe. "Ndi mupiile. Mfwileku luse, Mukalenge. Nyewu ndimanyisha. Ndi mwimane kuulu, Mukalenge, mu Bwikadi Bwebe. Ndi mumanye ne Wèwè udi kaaba aka. Ndi... Wèwè udi ne cya kwikala kaaba aka. Wäkamba ne eci neciikale ci—cintu cyúvwà mwa Wèwè kwenza. Mpindyewu ndi... Ndi mmona cimanyinu, ne ndi mumanye ne baamanyi kungumwija ne ki cidi ne cya kwikala cimanyinu cya dituku edi. Ndi ngumvwa Dìyì dyàbìikidi bwa kwalukila ku kanyinganyinga adi. S'ki mèmè ewu, Mukalenge. Ndi ngiitabuuja cimanyinu. Ndi ngumvwa Dìyì."

331 Dìyì diikàle dyakula neenu mpindyewu! Kudimukaayi, Éyì nwènù badi batangalake! Kudimuka, Éyì wèwè mutooto mulalakanyi! Kudimuka, Éyì wèwè udibo buumushe pa kaaba keebe! Kudimuka, diloolo edi!

332 Kwènàku muswe kukudimuka anyi? Juukila anu kuulu cyanaana wämbè ne: "Ndi ndimanyisha bu ngènzàmpèkààtù, ndomba luse." Udi musweku kwenza nanku anyi, muntu mukwabo? Nzambi akubeneshe, inäbànzà. Nzambi akubeneshe, lwà kuulu kwaka, wèwè mwanaanyi wa balume. Pängiikalà

mémè nciyi mukumone, Yèyè kaakupangaku kukumona to. Nzambi akubeneshe, inábànzà. Abi's mbilenga be. Abi's mbilenga be. Muntu mukwabo? Shaalaayi anu. . . Ndi muswe kushaala mwindile anu kasunsa kakwabo, bwalu ncidi anu ngumvwa kaabujitu mwaba ewu, nwamonu's. Muntu mukwabo? Nzambi akubeneshe, inábànzà. Ki mushindu wa kwenza ngwòwò awu. Ki mudibi. Muntu mukwabo wa ne: "Ndi muswe kudimanyisha, anu kwimanyina kuulu bwa kwamba ne ndi mupiile. Ndi ndomba luse"? Udi muswe kwenza nanku anyi? Lukasalukasa kumpala kwa twètù kutamba kuya kule, juukila kuulu wámbe ne: "Ndi muswe kudimanyisha, Mukalenge Yesu." Nzambi akubeneshe, nsongaakaji.

³³³ Udi mumanye's, pàmwápa kumpala kwa wèwè kufika kwebe kumbelu, kadi musangu kampanda nekukuvwile cibungibungi cya mashika mumpala mwebe amu. Pàmwápa dinda kampanda ngangabuka nealwe kuteeta dituuta dyebe dya mashi dipatukila mu diboko dyebe dya muteelu amu, kakuciya cikwabo cidid mwa kwenzaye to. Dîbà adi neúmvrè mavwala a mashika a lufu akulandala mumpala mwebe amu. Neuvuluke cyúdi mwenze aci.

³³⁴ Wavuluka ne, nansha bakujiike mu ciinà bule kaayi, kabeena ne cidibo mwa kukwenzela nansha cimwe to. Nzambi mmulaye ne: "Nênkujuulè cyakabidi ku lufu, ku dituku dya ndekeelu." Tangila. "Ewu udi umvwa Mèyi Aanyi ne witabuuja Ewu udi muntume Mémè, udi ne Mwoyi wa Cyendeleele ne kaakupita ku Cilumbulwidi to, kadi mmumane kuumuka ku lufu muye ku Mwoyi." Muntu akupule Aci's piikalaye ne mushindu. Yesu Kilisto ngwákamba Aci. "Ewu udi witabuuja (mbwena kwamba ne udi 'umvwa') Dîyi Dyanyi ne witabuuja Ewu udi muntume Mémè, udi ne Mwoyi wa Cyendeleele, kaadyakupitaku ku Cilumbulwidi to, dipiila, kadi mmumane kuumuka ku lufu muye ku Mwoyi." Bwalu, yèyè mmwitabuuje Mwânà umwepele mulela wa Nzambi, udi Nzambi mujuule ku lufu, kukaadi bidimu binunu bibidi, ne mwikale ne mwoyi mwaba ewu, diloolo edi, mwikale uleeja cyambiibwa Cyende cya dibiika Dyende dya ku lufu.

³³⁵ Nkufwanyineku kujuuka mukwabo, paanyima paa aci, mukwabo wa wamba ne: "Ndi muswe kuCiitaba. Ndi muswe kuMwitaba" anyi? Nzambi akubeneshe. Nzambi akubeneshe. Abi's mbilenga bya dikema's, nsongaakaji mutekete ewu. Aci's ncintu cya bukutu's. Ndi muswe bwa nwènu kumonaayi.

³³⁶ Mvwa mutangile dibiikila kampanda dya ku cyoshelu, anu abidi adi panshi aa mwab'ewu, bantu benda balwa, benda baacyankunya bàzòkà, benda baafunyangana.

³³⁷ Kadi nwamonuku mùdìku meeji matooke mumpala mwa bantu aba anyi? Bakaji batekete abu, nansha mene paanyima paa dibapiisha bwa dibebula dya nsuki yabo, dilaaba dya bilaabu kwisù; biikale ne bilaabu abi kwisù, ne nsuki mibebula ayi,

bajuuke kuulu anu muvwabo amu ne: “Ndi ngènzàmpèkààtù. Mfwileku luse, Nzambi.” Aci’s m’Mamiinu awu miikàle mateeka munda amu’s. Bukènkè mbwenze anu buteemenapu anyi, paawu kumba kubujingulula’s. Nzambi anubeneshe.

Twinyikaayaaku mitu yetu mpindyewu.

³³⁸ Ndi muswe bwa mwena kwitabuuja yònsò mwab’ewu, udi mwimane pabwìpì ne muntu wàjuukù awu, utentekeleku muntu awu cyanza, (udikù mwa kwangisha anyi?), wàjuukù kuulu awu. Yèyè uwu mujuuke kuulu ku luseke lwebe aku awu. Pawikala mwena Kilisto, umutentekeleku cyanza, kumutentekela cyanza ne: “Mwaneetu wa bakaji, mwaneetu wa balume, nyewu ndi mukutentekela cyanza mpindyewu. Nya’ nkaadi nsambila.”

³³⁹ Taatù wa mu Dyulu, kudi badi mwab’ewu diloolo edi biikàle—biikàle baKwitabuuje. “Mamiinu makwabo adi amata kumpenga kwa njila,” mùdì Wèwè mwambe, “nyuunyi yidi yilwa yàngula. Makwabo adi apona mu buloba bwa mabwe, mu mèbà ne mu mingonga. Kadi makwabo adi akabwela mu buloba bwìmpè, bwa bufuke.” Ne Bwikadi Bwebe bwikàle apa, diloolo edi, mbutwishe bààbùngì mwab’ewu diloolo edi ne Wèwè udi Mwànà wa Nzambi, ne Udi ne mwoyi kashidi ne kashidi. Kabidi Wèwè wàkalaya ne, bwalu Wèwè udi ne mwoyi, twètù tudi mwa kwikala peetu ne mwoyi.

³⁴⁰ Mukalenge Yesu, nyewu bajuuke ne biimane kuulu bu bujaadiki bwa ne mbaKwitabuuje. Mpindyewu, Mukalenge, ndi mumanye ne Wèwè newangate kaaba kaabo mu Dituku adi. Bènzèlâku nanku, Mukalenge. Nyewu nKupeeshabu, mu Dinà dya Yesu Kilisto. Swaku bwa baye ku ekeleeziya kampanda wa mwìmpè bwa kubatijiibwabo mu dibatiiza dya bwena Kilisto. Swaku bwa baadisanga ne musùmbà kampanda wa mwìmpè wa beena kwitabuuja. Swaku bwa buujiibwe tente ne Nyuma Mwìmpè. Swaku bwa biikale bitadi bya bucimunyi bya Evanjeeliyo, mabwe a musinga mukole ku cifulu Cyebe cya butumbi mu Dituku adi. Nenukù mèmè nciyiku mubamone cyakabidi dyàmùnu dya Dituku dinene adi, swaku bwa ngaabamona Dituku adi mùmwà mubamone mu cikeena-kumona aci, bamba ne: “Kwèna mumvuluke anyi? Muvwa mmu Baton Rouge, diloolo adi, dîngààkajuukà kuulu.” Twènzèlèku nanku, Taatù. M’Bèèbè Wèwè, mu Dinà dya Kilisto.

³⁴¹ Monaaku, kumpala kwanyi eku, nkuteeka kasheete kaa mishwala, tusabaata tukese, tuubikumbà, mishwala, ne tulàmbà, ne tulùlù. Tutu bayiile, mu Bible ne, bavwa bangata pambidi paa Pòlò Munsantu, mishwala ne tulùlù, nyuma ya bukooya yipatuka mu bantu. Mpindyewu, Taatù, tudi bamanye ne twètù katwena Pòlò Munsantu to, kadi Wèwè uciidi anu Nzambi umwèumwè awu, nenku ndi ndomba bwa Wèwè kufila bipeta bimwebimwe abi, bu mudi lukongo elu lwitabuuje ne meeji matooke ònsò. Bòbò abu kabavwaku biitabuuje Pòlò ne bwalu m’Pòlò to; bavwa biitabuuje Pòlò mbwalu Wèwè

uvwa mudifwanyikijile Wèwè mwine mu Pòlò. Mpindyewu mbiitabuuje cintu cimwecimwe aci diloolo edi, Mukalenge, ne Wèwè ngudi mudimanyishe munkaci mwetu, diloolo edi. Nenku dīngà dituku, tudi twamba ne . . .

³⁴² Mufundi kampanda uvwa utwambila, ne: “Izaleela uvwa mu njila mutangile ku buloba bulaya, ki Mbû Mukunze kulwa kucyamakana mu njila, bwa kubajikila njila wa ku buloba bulaya.” Mufundi awu kwambaye, ne: “Nzambi wakapwekeshila mèsù mu Dikunji dya Kapyà, ne mèsù a ciiji, pàakaseemenàDi kumutu kwa Izaleela. Dyôdì kufila bufofo, mîdimà kudi mwena bupidya, ne bukênkè kudi Izaleela. Nenku pàakacyàmakanà Mbû Mukunze awu mu njila, kukwacikaye bwôwà, kudisakaye paanyima, ki Izaleela kusabukaye kuya ku buloba bulaya biikàle bendela pa buloba bûme.”

³⁴³ Mukalenge Nzambi, pwekeshaa ku mèsù panshi diloolo edi, uàpwekeshila mu Mashì a Yesu Kilisto, Mwan’Ebe. Pândi ntenteka byanza byanyi pa mishwala eyi, paayiteekabo pambidi paa babeedi, swaku bwa Nyuma Mwîmpè, Mukalenge, atangije mèsù pa muntu awu, nenku swaku bwa disaamà dyumukepu, ne basabuke babwele mu buloba bwa bukole bwa mubidi ne makanda abu. Bwalu, Bible mmwambe ne: “Kumutu kwa maalu ônsò,” bavwa bajinga ne twètù “tutante mu bukole bwa mubidi.” Twènzèlèku nanku, Mukalenge. Nyewu nyituma, mu Dīnà dya Yesu Kilisto. Amen.

. . . mêmè nêndondè,
KwalombolaYe . . .

Twîmbààyi anu cyanaana.

. . . nêndondè,
Nênye Nende,

Mpindyewu Bwikadi Bwende budi mwab’ewu,
tuMukuukwilaayi anu cyanaana mu musambu, ne kalolo kônsò.

. . . njila mujima.

³⁴⁴ Nudiku mwa kuwimba, bushùwà, mushindu ewu:

KwandombolaYe mêmè nêndondè,
KwandombolaYe mêmè nêndondè,
KwandombolaYe mêmè nêndondè,
Nênye . . .

Bu wèwè mwa kuswa, mpindyewu elaaku cyanza cyebe muulu.

. . . Nende njila mujima.

Tujuukilaayi kuulu mpindyewu, biikàle beele cyakabidi byanza byenu muulu.

. . . Nende tuplicila mu budimi,

345 Muntu ne muntu ìmbè mu Nyuma mpindyewu. Diiyiisha dya ditàpa menemene. TuMukuukwilaayi mu Bwikadi Bwende. Yèye utu muswe kwikalabo baMukuukwila.

. . . mu budimi,
Nènye Nende tupicila mu budimi,
Nènye Nende, Nende . . . mujima.

Mpindyewu tùwìmbilaayi mu matama.

Ndi mwa . . .

346 Mpindyewu panudi nwenza nanku awu apu, ndi muswe bwa nwènú kulabulanganaku ne muntu kampanda ku cyanza, kwamba ne: “Nzambi akubeneshe, mwena lwendu. Nzambi akubeneshe, mwena lwendu,” mushindu awu. Tudi umwe twètù bônso muntu ne mukwende. Méthodiste, ne Baptiste, Presbytérien, beena Mpenta, labulanganaayi bônso ku cyanza ne: “Nzambi akubeneshe, mwena lwendu.” Ki citudi ncyôci aci: beena lwendu.

. . . mu budimi,

347 Nzambi akubeneshe, mwena lwendu. Nzambi akubeneshe, tudi banji kutùùdila mùneemu pamwe ne bantu bônso. Nzambi akubenesha, mwanèètù wa balume. Nzambi akubeneshe. [Katupa kaa mukaba wa mèyi munda mutupu—Muf.]

. . . budimi,

Mpindyewu twèlàayi byanza muulu.

Nènye Nende, kaa, Nende njila mujima.

348 Twinyikaayaaku mitu yetu, mu didipwekesha dyônso, mu disambila. Kanupu mwoyi to, mu dinda, kalaasa kaa Dyalumingu.

349 *Mu mushindu kampanda*, ndi anu ngumvwa Bwikadi bwa Nzambi bwikale anu bwa bushùwà ebu munda mwa mwoyi wanyi. Mu mushindu kampanda, mbinkolele anu bya menemene ebi bwa kuumuka, diloolo edi. Ndi ngumvwa ne Nyuma Mwîmpè mmusankishiibwe, diloolo edi. Pàmwàpa netwikale ne disangisha dinene maalaba, tumona bantu balwa kudi Kilisto, nwamonu’s. Muntu kampanda mmudikonke bwa cinyi ncyèna mwenze dibiikila dya ku kyoshelu. Ntu ngindila too ne pàngìikalà mulombodiibwe bwa kudyenza. Nwamonu anyi?

350 Ndi mutwishiibwe ne muntu yônso uwua mwele cyanza muulu awu, anyi mujuuke kuulu, ndi mutwishiibwe ne newikale ku ekeleeziya kampanda wa mwîmpè maalaba, wangata keebe kaaba munkaci mwa beena kwitabuuja.

351 Patucidi ne mitu yetu miinyika apa, ndi ndomba mpaasata ewu bwa kuseemenaye, bu yèyè mwa kuswa, bwa kututangalaja. Nzambi anubeneshe mpindyewu, ne mitu ne mwoyi yetu miinyika kumpala kwa Nzambi.



DÌYÌ DYÀ CIMANYINU LUA64-0321E
(The Voice Of The Sign)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo diloolo, mu matuku 21 a ngondo mwisâtù, cidimu cya 1964, mu Cilongelu cya Tulaasa tubàndile twa Denham Springs mu Denham Springs, Louisiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org